



BSP sapotim Helti Mama na Helti Bebi program - P9

Leit Nius!!

Tari atekim O'Neill

Pes 9



Ileksen Toksave long P6, 14 na 15



Polis Komisina Garry Baki, Sif Seketri Isaac Lupari, Iektrol Komisina Patalius Gamato na PNGDF Komanda Gilbert Toropu i sindaun na ol Iektoral opis bilong Sauten Hailens i sanap baksait. Joe Kaiyo, Sauten Hailans edministreta i sanap long hankais. Sif seketri i bin go long Mendi long sekim ol wok rere bilong poling wantaim polis operesen long Mande dispela wik. Poto Nicky Bernard long Mendi.

Vot i stat

5.6 milien man na meri vot long 2017 Ileksen

Paul Zuvani i raitim

ILEKTORAL Komisina Patilias Gamato i tok de bilong vot i kamap pinis na Komisen i redi long holim vot long dispela Sarere 24 Jun.

Em i tok inap long 5.6 milien manmeri i rejista long vot long 2017 Jenerel Ileksen.

Gamato i tok olgeta ilkesen menesa, ol ritening opisa, asisten ritening opisa na sekyuriti opisa long wan wan provins i stap pinis long opis na graun long helpim long lukim ileksen i kamap gut.

Em i tok olgeta balot bokis, balot pepa na ol arapela samting bilong vot i stap pinis long ol provins na

Komisen i no gat moa toktok long dispela.

Long dispela wik Gamato wantaim Sif Seketri bilong Gavman Isaac Lupari, Polis Komisina Gari Baki na PNG Ami Komanda Gilbert Toropo i mekim lukluk raun bilong ol long Hailans rijon long save sapos ol ples i redi long holim vot bilong ol long narapela wik Mande i go.

Long harim bilong ol Hela edministreta William Bando, Sauten Hailans Ileksen menesan David Wakias na Enga polis sef supritenden George Kakas i tok ol i redi pinis long holim vot bilong ol.

Gamato i tok ol Hailans provins bai gat wanpela de bilong vot.

Dispela em lsten Hailans, Simbu na Hela em ol bai go long vot long Mande Jun 26. Jiwaka na Sauten Hailans long Jun 30 na Enga na Westen Hailans long Julai 4.

Gamato dispela ol provins em Komisen bai holim wanpela de ileksen bikos long hevi bilong sekyuriti.

Ol arapela hap we i gat wanpela de bilong vot em long Nesenel Kapitelp Distrik na Lae em bikos Komisen i tok em ol isi hap we ol manmeri i ken go na vot isi.

Olgeta arapela provins em wan wan wod na distrik bilong ol ol bai vot stat long ol de namel long Jun 24 i go long Julai 8.

Ol de bilong kaunim ol balot pepa

bai stat long taim vot i pinis long dispela distrik na i mas pinis long Julai 23.

Long dispela taim Gamato i askim ol opisa bilong em long kamapim gutpela ileksen.

“Mi askim yupela ol ilkesen menesa na asisten ileksen menesa long menesim na kamapim gutpela nesinel ileksen long 2017.

“Hevi bilong kos bilong kamapim ileksen i mas stap daunbilo.”

Em i tok hevi bilong kos bilong ol samting, long frod (fraud), vailens na kros pait em i no gutpela nius na i no ken kamap.

I go moa long pes 9...

Sevim moa moni lo

MOBILE BILLS

Lukim page 7 lo moa.



PNG Air

Yu Gat Sois

Bukim Tiket

7222 2151

Fri Kol: 16111

Onlain Bukim Tiket:
www.pngair.com.pg



Enga i redi long vot - Kakas

Nicky Bernard i raitim

ENGA Provins i redi long givim fri, fe na seif ileksen long taim bilong makim pepa na kaunim vot long 2017 ileksen.

Provinsal Polis Komanda (PPC) bilong Enga provins, Sif Inspekta George Kakas i tokim ol inta-dipatmental ilektorel komiti o IDEC lain olsem ol pipel long Enga i redi long givim gutpela ileksen long 2017.

Mista Kakas i tok em wantaim ol Komiti bilong em i mekim planti awenes long taim pinis na ol pipel bilong Enga i save long wei bilong makim ol lida bilong ol.

Sif Inspekta Kakas i tok nau yet Enga i no gat tambu long salim bia o lika ben bikos ol i wokim olgeta ileksen awenes na edukesen pinis. Em i tok sapos em laik putim lika ben ken long nau, em bai ol samting i paul gen.

"Ol Enga pipel i save pinis long ranim seif, fe ileksens," Cl Kakas i tok. Em i tokim Siaman bilong IDEC na Sif seketeri, Isaac Lupari wantaim tim bilong em long Wabag taim ol bin go raun long sekim wok bilong redi bilong ileksen. Ol memba bilong dispela tim em, PNG Ilektoral Komisina, Patilus Gamato, RPNGC Komisina Gary Baki, PNGDF Komanda, Gilbert Toropo na ol senia opisa bilong ol disiplineri fos na edministresen long ol Hailans provins.

Sif Seketeri Isaac Lupari i tokim PPC Kakas wantaim ol ileksen opisa long Enga olsem IDEC i redi tasol long helpim ol long mekim dispela ileksen long i kam gut ol i mekim dispela raun.

Ol IDEC i givim awenes long ol Edministreta, ol Ritening Opisa na ol Ekting Ritening Opisa na ol disiplineri fos.

Lupari i tok gavman i givim K400 Milien long ranim dispela ileksen. K121 Milien em bilong sekyuriti wok na lepa ova em bilong ileksen stret.

Lupari i tok tu olsem dispela mani i redi pinis na stap long tras akaun na stap aninit long lukaut bilong Ilektoral Komisina na Polis Komisina na Ami Komanda.

Dispela wankain toktok ol IDEC lain i kam givim ol ileksen komiti long Hagen taim ol i pinis long Enga. Dispela raun bilong IDEC i go moa long Jiwaka, Simbu na bai pinis long Goroka.

Daunim nem long ileksen kempen i gutpela

Benorah C Hesehing i raitim

OL POLITIKEL pati na kendidet tude, i wok long wokim kempen long wanpela wei tasol, dispela em pasin bilong daunim nem bilong narapela kendidet o pati.

Mista Alphonse Muapi, Midia Konsalten bilong Ilektorel Komisen i tok

olsem: "Dispela i gutpela long demokrasi."

Dokta Alphonse Gelu, Rejistra bilong Politikel Pati na Kendidet i mekim wankain tok.

Em i olsem, ol i ken wokim kempen olsem; tasol ol toktok bilong ol mas i stap antap long tok i tru.

Ol pipel i no klia nau long wanem ol bai mekim o

husat ol bai makim olsem lida.

Ol i tokim Wantok Niuspepa olsem, ol dispela wei bilong kempen i no save kamap long bipo.

Liklik taim i stap yet long vot bai stat na planti daunim nem toktok i faulim ol man na meri.

Mista Muapi i tok, ileksen long PNG oltaim i save kamap wantaim rispek

long wanpela na narapela kendidet na politkel pati.

Tasol long dispela ileksen, ol politikel pati na kendidet i kempen long pasin bilong daunim nem.

Ol narapela demokretik kantri olsem Yunated Kingdim (UK) Yunated Stet of Amerika (USA) na Australia i save mekim wankain.

"Em i gutpela long demokrasi, tasol sapos ol

tok ol i wokim i no tru na narapela i no amamas, em i ken kisim dispela pati i go long kot," Mista Muapi i tok.

Wantok Niuspepa i traim long kisim moa toktok long Dokta Gelu long wanem taim PNG i bin kisim olgeta wei bilong ileksen kempen long ol dispela develop demokretik kantri tasol em i go aut long Nesanel Kepitel Distrik (NCD).

DSIP mani bilong Rigo mas kamap nau

KENDIDET husat i resis long Rigo Open long dispela ileksen i tok distrik sevises impruvmen program (DSIP) mani bilong distrik mas go long distrik nau.

Wari James Vele husat i bipo Nesanel Kapital Distrik gavana tasol nau i resis long Rigo Open i mekim dispela tok long taim planti DSIP mani bilong distrik i no go yet long distrik.

Em i no tok klia hamas mani i no go yet tasol i tok mani bilong mekim planti projek olsem wara saplai na wok stretim bilong ol skul na haus sik i no kamap.

Em i bilip sampela memba nau Ano Pala i no wok strong long kisim dispela ol mani long strongim distrik.

Nau yet Vele i wok long go aut long wan wan ol ples na toktok long ol man-



Wari Vele i kempen long wanpela ples long Rigo distrik.

meri long wanem samting em bai mekim sapos ol manmeri i givim vot long em long win.

"Membra i no yusim gut distrik sevises impruvmen program mani long developim distrik," Vele i tok.

"Mi bilip K10 milien i go long K15 milien long wan wan yia i bikpela mani na sapos memba i plenim gut,

dispela i ken senisim distrik long planti samting.

"Mi painim hat long save taim memba i tok mani i go yet o mani i sot na hat long mekim wok."

Vele i tok stat long taim Rigo Progress Ltd (RPL) kampani i kamap long 2009, ol masin we memba i tok em i baim long mekim ol rot i no stap na i askim

we ol masin i stap.

"Ol projek we RPL i mas kisim kontrak long em i no kamap na sapos i tru kampani i stap mipela i no harim wanpela fainensal ripot bilong em."

Vele i tok maskim RPL i makim tripela lokal level gavman (LLG) long dispela memba (Pala) i luk olsem i wanpela tasol i seaholda

long dispela kampani.

Em i tok bikos long dispela Pala inap long stretim ol rot na ol arapela samting long distrik tasol em i no bin mekim.

"Mi sanapim ol polisi bilong mi long ol rot we mipela i mas tromoi mani long we sevis i mas kamap gut," Vele it ok.

"Mi laik bai edukesen i mas namba wan wok bilong sapotim, bihainim dispela em helt na wok fiseri na didiman."

Vele i laik lukim ol manmeri i gat strong long mekim wok na i no stap nating o stap tarangu.

Em i laik wok strong wantaim praivet na ol sios wantaim long bringim sevis i go long ol.

Em i bilip em i gat ol gutpela polisi na plen we ol manmeri i ken trastim na givim vot long em long taim bilong ileksen.




PPC bilong Enga, George Kakas (long lephan) wantaim Polis Komisina i wokabaut go long Ipatas Senta long Wabag taun. Polis Komisina i bungim tu wanpela famili bilong em long Wabag na wokabaut wantaim. Poto Nicky Bernard - Wabag

PNG kisim gutpela lek mak long lukautim gut disasta

PAPUA Niugini i kisim gutpela lek mak long kamapim Nesanel Disasta Risk Fremwok wantaim wanpela nupela Teknikal Woking Grup (TWG) bung long Nesanel Disasta Senta (NDC) long sapotim developmen bilong ol ajenda.

NDC i go pas long developmen bilong PNG Disasta Risk Menesmen Fremwok bilong yia 2017 i go inap 2030. Dispela em i hap bilong wanpela join



Kaigabu Kamnanaya, Asisten Dairekta (Risk Menesmen) long Nesanel Disasta Senta (NDC).
projek wantaim Yunaitet Nesen Developmen Program (UNDP). Fremwok bai strongim PNG long toktok long ol bagarap bai kamap aninit long

disasta long ol komyuniti na kantri
TWG i kamap wantaim gavman na nanggavman ogenaissen i bin go pas long namba wan woksop bilong ol

long Fraide Jun 16, 2017, bilong sapotim NDC long developim nupela Fremwok.

"Astingting bilong dispela woksop em, mipela i laikim wanpela nesanel fremwok long kamap long PNG na long ol wan wan stekholda, patna na provins, distrik na lokal level gavman,"

Asisten Dairekta (Risk Menesmen) long Nesanel Disasta Senta, Kaigabu Kamnanaya, i tok.



Hai Komisina bilong Australia, Bruce Davis, na Newcrest Mining Limited PNG Kantri Menesa, Peter Aitsi, i sekan.

Australia givim skolasip long PNG

NUPELA wok bung namel long Australia Gavman na Newcrest Minig Limited i tokaut long kamapim gutpela metenal heltke long Nu Ailan na Morobe Provins wantaim bikipela namba bilong kwalifai midwifri o ol nes bilong helpim ol mama long karim pikinini.

Aninit long dispela patnasip, ol i givim 4-pela skolasip long ol nes long dispela tupela provins long skul long midwifri long St Mary's Skul bilong Nasing long Kokopo, Is Nu Briten, na Pasifik Edventis Yunivesiti (PAU) long Nesenel Kapital Distrik.

Hai Komisina bilong Australia, Bruce Davis, i tok olsem dispela ol awod em ol bikipela eksampel bilong pablik na praivet sekta long wok bung wantaim long sosel developmen na ikonmik objektiv bilong Papua Niugini.

"Gavman na praivet sekta patnasip olsem Newcrest Mining Limited, na ol patna namel long Australia na Papua Niugini institusen, i soim pablik na praivet sekta kopresen i ken helpim long developim ol bikipela samting olsem metenal na helt bilong ol pikinini," Davis i tok.

Newcrest Mining Limited

PNG Kantri Menesa, Peter Aitsi, i tok, Newcrest i amams long wok bung wantaim Australia Gavman long redim mani bilong skruim namba bilong metenal helt sekta long rijon insait long kantri.

"Em i hap bilong plen bilong mipela olsem wanpela developmen patna na dispela invesmen bai kamapim lokal helt sevis na bai helpim ol komyuniti insait long provins na kantri long sait bilong karim pikinini," Aitsi i tok.

Australia Awod-Newcrest Mining skolasip bai karamapim mani bilong tusen na boding, transpot na medikol insurens.

Kokoda Trek sumatin i gat nupela skul fesiliti

PATNASIP namel long Australia na Papua Niugini i kamapim gutpela sindaun bilong ol pikinini bilong Kokoda Trek long bihain taim.

Ol nupela skul bilding na wanpela strongpela het tisa i senisim Kokoda Trek skul na i sevim 4-pela komyuniti long Sentrel Provins.

Kavovo Pramereri Skul long Maun Koiari rijon i gat nupela dabol klasrum, tupela klasrum ol i bin stretim gen na wanpela haus bilong tisa. Kokoda insietiv i wok bung wantaim provinsal edukesen atoriti na i kamapim ol dispela haus.

Ol papamama na tisa long Kagi, Naduri, Maraba, Daoi na Borideria i amamas long taim ol i opim ol nupela fesiliti long las wik wantaim Australia Hai Komisina, Bruce Davis, na Provinsal Edministreta, Gei Raga.

Ol nupela klasrum i



Australia Hai Komisina, Bruce Davis, na Het Masta bilong Kavovo Pramereri Skul, Michael Irai.

gat ol nupela desk na ol samting bilong skul. Nupela toilet, wara tank na fesiliti bilong wasim han em ol i redim tu bilong helpim sumatin long stap helti.

Hai Komisina Davis i tok, Australia na PNG i skelim wanpela bikipela samting long dispela Kokoda Trek, na Australia Gavman i promis long sapotim gutpela edukesen long ol sumatin insait long Kokoda Trek rijon.

"Dispela em i bikipela

hap bilong Papua Niugini na Australia. Dispela yia em i 75 aniveseri bilong Kokoda Kempen, we ol man bilong Papua Niugini na Australia i bung wantaim na pait, wok bung wantaim, slip wantaim na i dai wantaim," Davis i tok.

Misat Davis i tok tenkyu na amamas long Het Masta bilong Kavovo Pramereri Skul, Michael Irai, na ol tisa bilong em husat i wok strong wantaim long kamapim level bilong

skul inap long taim em i bin kam long yia 2015.

Bipo, skul i save painim hat taim long holim bek ol tisa na planti sumatin i no save stadi gut. Nau ol sumatin i stat skul gen na namba bilong ol sumatin i stap mak long 30 long 2015, tasol em i go antap long 126 long dispela yia.

"Mipela i ting olsem, bihain long wanpela o tupela yia, dispela skul bai kamapim sampela gutpela sumatin. Ol sumatin i pas aut long dispela skul em nau ol i stap long gret 11. Mipela i ting olsem ol dispela sumatin bai go insait long ol yunivesiti long kantri," Irai itok.

Em i tok, ol nupela fesiliti i helpim ol sumting long skul gut long kisim ol gutpela risal.

"Namba wan taim bilong ol sumatin i sindaun long gutpela desk. Ol i no gat dispela bipo na ol i no bilipim," Irai i tok.

NMSA i givim tok lukaut long ol Bot Opreta

NESENEL Maritaim Sefti Atoriti (NMSA) i givim tok lukaut long papa bilong ol liklik bot na ol opreta long bihainim ol solwara sefti long long dispela taim bilong win.

Sif Eksekutiv Opisa bilong NMSA, Paul Unas, i givim dispela tok lukaut long Tunde bihain long wanpela hevi i kamap long wanpela bot long las wiken long Pot Mosbi we tripela lain i lus na ol i sevim wanpela man tasol.

Ol i ripot olsem 4-pela pasindia i stap antap long wanpela banana bot na i go long Fisherman Ailan. Ol i lusim siti na inap kamap long dispela ailan bihain long 30 minit, tasol ol dispela lain i no kam bek long Royal Papua Yacht Club (RPYC) long Sande.

RPYC i ripot olsem i



Sif Eksekutiv Opisa bilong NMSA, Paul Unas.

no gat wanpela toktok i kamap long bot long radio o ol i no tok save olsem ol i lusim klap.

Ol i gat askim olsem bot i mas kapsait long Sarere apinun na wanpela PNG man husat i gat 32 krismas i stap laip yet. Tasol tripela man long Australia, Fiji na PNG i lus long solwara.

Reskiu kodineting senta bilong Australia na PNG Maritaim i wok bung wantaim na i painim ol tripela lain i lus.

Man husat i stap yet long bot i tok olsem

bot i kapsait long Sarere, Jun 10.

Mista Unas i tok olsem ol papa bilong liklik bot i mas bihainim gut ol sefti lo na ol i mas noken lodim planti pasindia na go long taim weda i nogut.

Em i tok olse sapos ol i feil long bihain ol solwara sefti lo em ol bai kisim sampela bikipela penelti aninit long Liklik Kraf Ekt (SCA).

Mr Unas i strongim olgeta lain i slip arere long solwara long bihainim solwara sefti.



WE ARE WHERE YOU ARE!

BSP has a strong domestic presence with the largest network of Agents in PNG.

40+ Branches | 40+ Sub Branches | 170+ Agents
300+ ATMs | 7,500+ EFTPOS



WE ARE BSP

www.bsp.com.pg





Ol Madang rijonal kendidet kempen long rurel distrik

Wankain nem i kamap planti taim long ilektoral rol

James Kila i raitim

OL KEMPEN tim bilong ol Madang rijonal kendidet wok long bisi stret nau long kempen long ol rurel distrik long provins long traim winim namba insait long dispela 2017 Nesenel Ileksen.

Madang provins i gat maunten, nambis ples na ol ailan na ol dispela rijonal kendidet i wok long yusim ol risos bilong ol long go aut long ol dispela rurel na bus ples long soim pes na autim polisi bilong ol long winim vot.

Wanpela kendidet husat i go pas tru long go aut long planti rurel na longwe ples insait long Madang provins long 2017 Nesenel Ileksen em Alois Kingsley King, husat i yusim helikopta na flai i go aut long ol longwe ples na kempen.

Kingsley i pastaim memba bilong Madang, na nau em i resis long rijonal sit na i salensim sampela ol biknem lida long provins olsem pastaim gavana James Yali, pastaim PNG Difens Fos



Dispela kempen kar i traim kisim wanpela kendidet i go arere long hanwara bilong Ramu Wara tasol klostu wara i karim em i go bikos draiva no fit long draiv abrusim wara long rurel eria. Poto: James Kila

Komanda, Jerry Singirok, Sif Peter Yama, Jim Kas, yangpela lida Ramsey Pariwa na ol arapela.

Lida bilong politikol pati bilong Madang, Sif Peter Yama tu i oge-naisim bikpela kempen tim bilong em na i go aut pinis long ol rurel distrik long mekim toktok bilong em.

Kempen rali bilong Yama long Sarang viles long Sumkar distrik i bin winim stret tingting bilong planti lain, na planti i tokaut stret olsem Yama em trupela eksen

lida Madang provins i nidim long stap olsem gavana bikos em man bilong toktok strong na tok-salens long palamen long bringim developmen.

Planti ol rijonal kendidet i no westim taim long taun o ples we i gat rot na bris i go long en. Ol i wok long go insait tru long bus long kempen na autim politik tingting bilong ol long winim bel bilong ol pipel long votim ol.

Ol maunten eria long Madang we i gat popule-

sen o manmeri i stap long en em long Midel-Ramu long sait long Simbai, Aiom, Josepstaal na tu long Wanuma eria. Long Raikos distrik em ol longwe ples antap long maunten em ol ples olsem Teptep, Tauta na ol ples long Nayudo i go boda wantaim Ramu Suga. I gat ol ples olsem Bundi, Yandera ol arapela longwe ples we i boda wantaim Simbu na Westen Hailans olsem ol lain Hagahai pipel i stap long en.

Ol ailan komyuniti we i gat ol manmeri i stap

long en em long Long Ailan, Karkar, Manam na Crown ailan.

Wanpela kaunsila long Long Ailan i tok olsem planti yia ol lida i save go na mauswara long Long Ailan long bringim developmen, na ailan i stap wankain yet.

Em i tok ol bai vot long laik bilong ol taim ol i sanap long balot bokis long makim kendidet ol putim mak long em tasol bihain long dispela wanem em gutpela sevis ol lida husat i win bai bringim i long ol long sapatim laip bilong ol.

URGENT!!

URGENTLY REQUIRE STREET SALES AGENTS & DISTRIBUTORS TO DO BULK SUBSCRIPTION OF WANTOK NIUSPEPA IN THE FOLLOWING LOCATIONS

Rabaul, Kiunga, Tari, Jiwaka, Manus, Wabag, Kavieng, Simbu, Tabubil, Lae, Mendi, Bulolo, Popondetta, Wewak, Vanimo and Kerema

Qualification:
No specific qualification is required, can be an individual, family, a retired worker or someone who is already engaged in doing News Paper contract work.

For more detail information please call
The Circulation Supervisor, Mr. Mark Timbi on Phone: 3252500, mobile phone: 72703860/75690395 or email: mtimbi@wantokniuspepa.com circulation@wantokniuspepa.com

Ilekesen Awenes bai gohet

Benorah C Hesehing i raitim

ILEKSEN awenes bai gohet inap taim bilong vot.

Ilektorel Komisen i putim dispela awenes long skulim ol man na meri long wei bilong vot long 2017 nesenel jenerel ileksen.

Dispela awenes i stat pinis long Nesenel Kepital Distrik (NCD) long Pot Mosbi wantaim helpim bilong siti atoriti NCD komisen (NCDC), na ba gohet inap taim bilong vot.

Asisten Ritening Opisa bilong Mosbi Not Is, Sepoe Gabutu i tok klia long wei bilong vot long dispela bung.

Em i tok gat tripela

laik bilong yu long makim ol kendidet yu laikim, na yu mas makim ol dispela kendidet long rait balot pepa.

Blu kala balot pepa em bilong rijinel sia na yelo kala balot pepa em bilong ilektoreit o open memba sia.

Yu mas makim rait bokis namba na nem long rait balot pepa.

Sapos yu putim nem na bokis namba bilong rijinel sia kendidet long ilektoret balot pepa, ol i no inap kauntim vot bilong yu.

I gat tupela box, olgeta blu kala balot pepa bilong rijinel sia bai go long blu kala bokis na yelo kala balot pepa bilong ilektoreit o open memba sia bai go long

yelo kala bokis.

Ileksen Menesa bilong NCD, Terence Hetinu i tok strong olsem ol pipel i mas noken bagarapim vot bilong ol, sapos ol i mekim olsem, ol i no inap kaunim vot bilong ol na bai ol i wait bihain lon 5-pela yia long kisim dispela sans gen.

Em i demokretik rait bilong olgeta Papua Niugini man na meri long vot gut, makim gutpela lida na banisim demokresi bilong kantri.

Mista Hetinu i tok klia long as tingting bilong awenes na i ok ol pipel i mas tingting gut, bosim ol yet, bosim ileksen na vot gut long laik bilong ol yet wantaim nogat pret.



Glasim Wokabout
wantaim
Rosa Koian

Wanem kain senis yumi laikim?

Nau long dispel taim planti bilong yumi i singaut long senis. Yumi laikim senis tasol sori tru yumi lukluk tasol long senis bilong lidasip.

Sapos yu mama bilong famili na yu save wari olgeta taim long sik pikinini bilong yu em i taim nau long yu tingting long kirap na mekim sampela senis. I luk olsem olgeta liklik haus sik insait long kantri i sot tru long marasin na gavman i no hariap long stretim dispel hevi. Olsem wanem tru na i olsem?

Sapos yu papa mama bilong pikinini ating yu harim pinis het tisa i toktok long hevi bilong fri edukesen. Olsem wanem bai yumi pasim ia na larim ol pikinini i go tasol long skul? Kain pasin i no helpim pikinini na i putim planti hevi antap long tisa.

Go moa yet sapos yu wokman o wokmeri na yu save sotwin olgeta fotnait taim yu lukim peisliplong blong yu, bai yu larim tasol olsem? No gat. Yu mas toktok long hevi bilong traipela takis gavman i wok long rausim long fotnait pei bilong yu.

Insait long ol ples, sapos yu fama na ol gaden kaikai bilong yu i no save go long maket bikos i no gat rot tasol taim yu gat sans long kam raun long siti na yu lukim planti hanger pikinini na family bai yu sori. Yu bai tingim bek olgeta naispela kaikai long gaden bilong yu inap helpim wanpela famili long siti.

Yumi stap long wanpela taim we yumi ting system bilong mani em inap lukautim olgeta nid bilong yumi. Sistem bilong mani em i rabisim ol gutpela pasin bilong yumi na em i mekim yumi bilip olsem em inap lukautim sik bilong yumi o ol pikinini bilong yumi.

Dispela sistem we yumi traim hat tru long stap insait long en i wok long sakim yumi i go long sait. Planti i save lusim asples bilong ol na spit i kam long siti wantaim tingting olsem long siti olgeta samting i stret tasol.

Traim lukluk long ol strit bilong yumi long Mosbi siti na bai yu lukim hamas pikinini i no stap long skul. Ol i bisi long maket long strit. Dispela em i wanpela ret lait na yumi mas askim: Olsem wanem tru na dispela i kamap?

Yumi laikim senis yumi no ken lukluk long dispela man o meri em i wok long resis nau long ileksen. Yumi mas putim ia gut long wanem kain senis tru pati bilong em i laik bringim. Yumi tu i mas helpim dispel lida long singaut long gutpela senis we inap long helpim komyuniti olgeta.

Insait long ol komyuniti bilong yumi i gat sampela gutpela tingting i wok long ran, na sampela i no wetim lida bilong gavman long kamapim senis. No gat. Ol i go het pinis na mekim samting i kamap. Sapos dispel ol tingting na wok i helpim komyuniti traim tingim politikel lidasip bai i mekimwanem kain gutpela senis antap long dispela?

Sapos haus sik na marasin na skul na rot i no wok long helpim yumi bai yumi mekim wanem? Sapos yumi wok long baim traipela takis i go long gavman tasol yumi no kisim sevis long haus sik na skul na rot ating yumi wok long baim takis nating ya. Husat i benefit long dispela?

Senis bai i kamap sapos yumi olgeta i sanap na painim nupela rot. Dispela ol rot i mas kam long yumi yet.

Ol Sumatin i go lukim MCC Hetkwata

WANPELA grup sumatin husat i stap skul long China i bin makim ol arapela long go lukluk raun long hetkwata bilong China Metalujikal Grup Korporensen (MCC) long Beijing, China long las wik.

Dispela hetkwata ofis bilong MCC i gat wanpela ofis lukautim het-ofis bilong Ramu NiCo Menesmen MCC, we nau i wok long nikel/kobalt maining projek long PNG.

Man i go pas long kisim ol sumatin i go, em wanpela pas-taim wokman na RNML treining menesa long Basamuk Rifaineri, Jeffers Teargun Heptol.

Em nau i stap long China long skul na PhD o dokta digri bilong em.

Vais Presiden bilong MCC Foren Invesmen, Gu Yuxiang na RNML Beijing Opis menesa, Gao i bin givim gutpela welkam long ol dispela lain sumatin long MCC hetkwata.

Mista Gu, i tok amamas long ol sumatin, na i tokim ol olsem em i amamas long lukim ol i go skul long China na kisim save long bringim i go bek long PNG



MCC Beijing: PNG sumatin wantaim Vais Presiden bilong MCC Foren Invesmen, Gu Yuxiang long MCC hetkwata long Beijing, China.

long helpim developmen long hap.

Mista Heptol i makim maus bilong ol sumatin long tok tenkyu long MCC.

Bihain em i askim sapos MCC i ken givim trening long ol sumatin long China, na sapos MCC na RNML i ken givim namba wan luksave long ol sumatin taim ol i pinisim stadi

long China.

Mista Gu i bekim olsem MCC i ken kisim ol dispela sumatin long wok sapos kampani i nidim wokman na meri long wok eria bilong en, tasol ol dispela sumatin mas aplai pas-taim.

Ol sumatin i luksave long MCC na wok bilong en na ol han-kampani bilong MCC i stap

long China yet long arapela kantri long wol.

Wanpela sumatin Chrioni Mungore, husat i stadi long Intanesenel Invesmen long Beijing, i tok olsem em i ting MCC save wok long maining tasol. Nau em i luksave olsem ol save wok long ol bisnis eria olsem bilding na rot konstrak-sen tu.

Ol PNG Power teknisens go trening long DBTI



Arlene Abital na Karl David Valmonte i raitim

LONG Pot Mosbi, 17 PNG Pawa teknisen i bin kisim wanpela kompetensi trening long Don Bosco Teknikal Institut long Boroko, stat long las wik Tunde.

Dispela trening ol i kolim long Kompetensi trening i bin stat long Jun 13 na bai pinis long tumora Fraide Jun 23 na ol i bin yusim ol fasiliti bilong DBTI Mentenens Fiting na Masin skul.

Mista Samson Kantha, Haidro Trena long PNG Power i tok, MFM woksop long Institut em i gat inap masin long

wokim dispela kain trening bilong ol 17 trening teknisen, wanpela meri na 16 em ol man.

Mentenens Fita na Masin ekstensen 1 blok kos i gat disain bilong rot bilong lainim i go long Level 2 na Level 3 i go long wanpela treid kwalifikesen we i gat luksave aninit long NATTB standet na NTC Kwalifikesen.

Namel long ol trening lain, 8-pela em ol aprentis husat bai go mekim NATTB Treid Tes Level 1, 7-pela em ol trening teknisen na tupela em ol treid asisten. Ol dispela trening teknisen i bin mekim wok trening pinis

long Rouna, Yonki na Warangoi Haidro pawa stesin.

Ol DBTI instrakta, Julius Pagaurea na Br. Reto Wanner, SDB i bin go pas long woksop wantaim ol wok na supevaisim ol trening na Samson Kantha bilong PNG Pawa na Francis Oa i helpim ol insait long dispela tupela wik.

Trening patnasip bilong DBTI na PNG Power Limited i bin stat long las yia na sampela ol teknisen sumatin bilong ol nau i stap long wok olsem ol AutoCAD, MFM na Programmable Logic Circuit.

"Kamapim gutpela wok bung wantaim industri i kamapim

Yangpela meri treni teknisen, Doreen Nelson wantaim narapela wan wok i traim long yusim ol masin long taim bilong trening long DBTI. Foto: DBTI Midia.

Yumi mas lukautim envairomen

James G. Kila i raitim

OL SUMATIN i mas bihainim pasin bilong Buk Baibel na soim gutpela pasin long bus, graun, wara na solwara, wanpela pasta bilong Evanjelikal Luteran Sios (ELC-PNG) i tok.

Pastor Raymond Neza i mekim dispela tok long Wol Envairomen de las wik Tunde long Dein praimeri skul, long Raikos distrik, Madang provins.

Em i tok olsem Papa God i blesim tru Papua Niugini wantaim gutpela a gutpela ples sindaun. Em i putim yumi ol manmeri long lukautim ol samting em i wokim na yumi mas lukautim gut wantaim gutpela bel na tingting.

Papa God i blesim kantri bilong yumi na i putim yumi long bosim na lukautim olgeta samting.

Yumi i no ken putim paia long bus nating long bagarapim ples bilong ol animol, Pasta Neza i tok.

Ramu NiCo Envairomen Supritenden, Moses Ya'a i strongim tok bilong Pasta Neza na i tok: Yumi ol man na meri, taim haus bilong yumi i paia, yum i no save amamas, wantaim long envairomen bilong yumi tu.

O'Neill i as bilong ol man i brukim lo, Pruaitch tok

LONG Papua Niugini i rausim nating Katolik lei misinari i go aut kantri dispela i no gutpela pasin, Memba bilong Aitape na bipo Minista bilong Tresari Patrick Pruaitch i tok.

Long dispela Pruaitch i sutim tok long Praim Minista Peter O'Neill olsem em i as bilong ol kain hevi olsem.

Em i tok O'Neill i bin statim olgeta pasin nogut bilong brukim lo long namba wan taim, taim PM i sakim tok bilong Suprim Kot na kamap praim minista long 2011 na 2012.

Em i tok taim PM i mekim olsem olgeta narapela man o meri i lukim i redi long brukim lo.

Pruaitch i mekim dispela tok long taim Katolik lei misinari, Douglas Tennent bilong Nu Silan em ol Imaigresen na Sitisensip Opisa i rausim i go aut long kantri long las wik.

Em i tok maski Tennent i tokim ol opisa olsem em i kisim "Stay" oda long stap bek, opisa i tok nogat long em na tokim em long em i mas go.

Pruaitch i tok sapos

Kot i givim oda orait olsem wanem na opisa i salim Tennent long go?

Tennent bipo i tisa bilong lo long Yunivesiti bilong Papua Niugini tasol i lusim na nau i kisim wok wantaim Rabaul Asdaiosis olsem Edministreta.

Asbisop bilong Rabaul, Francesco Panfilo, i tok kain rot bilong rausim Tennent i mak bilong bikpela korapsen pasin.

"Gavman i saptim ol bikpela kampani husat i bagarapim laip na samting bilong ol liklik manmeri na i lus tingting

long ol."

"Dispela em i bikpela mak bilong pasin korapsen na i sori taim bilong Papua Niugini," Asbisop Francesco i tok.

Ol sut tok nau i kamap olsem Minista bilong Foren Afeas na Treid Rimbik Pato na ekting dairekta bilong Imaigresen na sitisensip Solomon Kantha i givim oda long Tennent i go.

Kantha i tok dispela disisen i kamap bihainim wanpela pas ol papagraun long Pomio, Is Nu Britan i salim na kros long Tennent i no mekim wok stret bilong em.

Hela na Sauten Hailans redi long Vot

Nicky Bernard
i raitim

HELA na Sauten Hailans Provins i redi long putim mak long pepa long makim lida bilong ol long taim bilong poling stat long neks wik.

Hela bai namba wan provins long poling de long makim lida bilong ol wanpela de tasol. Dispela wanpela de poling em Hailans rijon, Morobe, NCD na Is Nu Briten tu bai go insait long en.

Edministreta bilong Hela provins, William Bando i tok olgeta Ilek-sen opisa bilong em i redi long kamapim wanpela gutpela na fri Ilek-sen long Hela wantaim helpim bilong ol join sekyuriti fos.

Bando i tok Ilek-sen menesa wantaim ol opisa bilong em i redim



Ilektoral Komisina Gamato bin raun long go sekim ol wok rere bilong Ilek-sen long Hela.

olgeta samting bilong poling na kaunim na wetim de tasol bilong poling.

Mista Bando i tok aut long dispela tok long Tari taim Sif Seketri bilong Gavman Isaac Lupari, Polis Komisina Gary Baki, PNGDF Komanda Gilbert Toropo na Ilektore Komisina Patilias

Gamatu bin raun long go sekim ol wok rere bilong Ilek-sen long Hela long Mande.

Ol dispela lain wantaim siaman bilong ol Lupari, tu i bin raun go long Mendi taun long bung wantaim Edministreta bilong Sauten Hailans wantaim Ilek-sen Menesa na ol poling opisa

bilong em.

Ol dispela 4-pela bai go long Wabag na bihain kam daun long Hagen, Jiwaka, Simbu na Goroka bai pasim olgeta wokabaut bilong Komisina Baki, Ami Komanda Toropu, Sif Seketri Luparina Ilektorel Komisina Gamatu.

Gavman mas putim wok painim aut

DAIOSIS bilong Alotau-Sideia i lakim gavman i mas makim lain bilong wok painim aut hariap long wanem as Papua Niugini (PNG) Imigresen i rausim wanpela wok man bilong sios.

Ol i tok, wei PNG Imigresen i rausim Mista Douglas Tennent, administreta bilong Archdiosis bilong Rabaul i egesim lo bilong kantri.

I mas gat gutpela wok painim aut long dispela hevi. Archdiosis bilong Rabaul i save givim gutpela helpim long ol pipel long hap.

PNG Imigresen i mas tok klia gut long as tingting na wanem asua Mista Tennent i mekim na ol i rausim long kantri.

Taim Katolik Asdaiosis bilong Rabaul i askim

PNG Imigresen long asua bilong Mista Tennent, ol i tok em i stap insait long sampla hevi bilong ol papa graun .

Asdaiosis i laikim PNG Imigresen tokaut long ol dispela papa graun na long wanem ples dispela hevi stap.

Mista Tenent i bin bringim bel isis long ol papa graun long Wes Pomio taim ol i kros na stap na askim em long

bungim ol gen, long pasin lotu.

"Long ol narapela hevi bilong ol papa graun, em nem na signesa bilong mi i stap long ol dispela pepa," Asbisop bilong Rabaul, Francesco Panfilo i tok.

Em i tok pasin bilong stretim pasin birua namel long ol pipel na sios famili, em pasin kristen.

Katim

BILLS

...ino toktok

Ring o emailim mipla sapos yu laik save lo moa!

7555 5555

cutmybill@bmobile.com.pg

www.bmobile.com.pg

bmobile | vodafone

BSP sapotim Helti Mama na Helti Bebi program

I gat bikpela mak bilong ol sik we inap long stopim tasol i save kamap na kilim ol mama na pikinini. Em ol kain sik olsem anaemia o sot long blut, malnutrisen o sik bun nating, malaria, na ol narapela sik olsem.

Dispela toktok i kam long stat bilong ripot bilong risets data we Burnet Insitut Helt Mama, Helt Bebi Program i kamapim.

Moa long 5,000 nupela bebi i kamap long olgeta yia insait long PNG, tasol narapela lain 7,000 bai i no inap stap laip long lukim namba 5 krismas bilong ol. Tupela hap namba bilong dispela lain i dai i no inap long dai sapos i gat ol gutpela wei bilong stopim.

HMHB em i wanpela

5-yia risets program we bai luksave long ol bikpela tingting long wanem na PNG i gat bikpela namba tumas long ol mama na bebi i save dai long taim bilong mama karim bebi, long wol, na painim ol wei bilong duanim dispela namba.

Benk Saut Pasifik (BSP) i sapotim HMHB Program bilong Burnet Insitut wantaim K250,000 sponsa mani long dispela yia. Em i wanpela hap bilong tripela yia kontrak.


Burnet Insitut Dairekta na CEO, Profesa Brendan Crabb i tok, "Mipela i luksave long helpim bilong BSP yet. Dispela program em bilong trenim ol lokal Papua Niugini wokman na wokmeri long helt sekta long

wok bilong helt bilong ol mama na pikinini."

BSP Jeneral Menesa, Ritel, Paul Thornton i tok, "Benk i luksave olsem helt bilong ol meri long PNG em i bikpela samting. Mipela i luksave long wok bilong Burnet Insitut na ol patna long dispela bikpela wok bilong ol Helti Mama, Helti Bebi Program."

"Mipela i save olsem wantaim dispela las komitmen, Benk inap long givim samting long kamapim gutpela senis namel long ol pipel na komyuniti we mipela i stap," Mista Thornton i tok.

"Dispela sapot bilong ol meri na pikinini i bihainim tingting bilong 2017 Komyuniti Projek 'Empowering Women and Children'."



Leboratori Teknisen Ruth Fidelis (R) na Risets Opisa Priscah .

Mama na ol bebi i wet long kisim helpim long helt klinik long Is Nu Briten.

MRA ripot tok planti main wokman dai long hat-atek

James G. Kila i raitim

OFIS bilong Sif Inspekta ov Mains aninit long Mineral Risoses Atoriti (MRA) i givim bikpela helt tok-lukaut i go long olgeta wokman meri long maining indastri long Papua Niugini long lukautim gut helt bilong ol.

Dispela em bikos ol maining wok lain i save mekim planti wok tumas na save kaikai planti gutpela kaikai, dring planti bia na tu no gat gutpela ekksesais bilong ol. Long dispela as tasol em nau i wok long lukim sampela ol maining wokman i dai long hat-atek na tu planti i gat hai-blut presa na hat atek na long lewa na hat bilong ol.

Dispela helt na sefti tok-lukaut (alert) i bin kamap long sampela mun i go pinis tasol toksave i go aut yet tude. Em i bin kamap bihain long ol dai i bin sampela maining kampani long PNG.



Ol maining wokman nidim moa fisikol ekksesais na mas kisim gutpela helti kaikai na no ken dring bia tumas.

Wanpela ripot we i kamaut long Ofis ov Sif Inspekta ov Mains i tokaut olsem long stat long dispela yia tasol, wanpela main wokman i bin pundaun long wok ples na wanpela sait long bodi bilong em i dai o paralais, na ol i kisim em long helikopta i go long haus sik, tasol em i dai.

Long narapela ripot tu i tok

sampela ol maining wokman i kisim bagarap long wok-ples bilong ol na pundaun tasol na dai. MRA Sefti Brens i tokaut olsem i gat kain kain ol as tru o risen we i bringim kamap hat-atek o sik long lewa na hat.

Dispela em long hai-blut presa, planti suga long blut, bikpela gris long bodi na bel i solap long kaikai planti na dring

bia tumas na nogat ekksesais.

MRA i tokaut tu olsem long 2016 PNG Maining Indastri i gat ripot long 655 keis bilong laipstail disis (sik). Insait long dispela ol keis em 55 pesen em lain em weit bilong ol i antap moa, 15 em obesiti (fat tumas), 11 pesen em haipatensen (hai blut presa) na 5 pesen em daiabetik.

MRA Sefti brens i tokaut tu olsem i gat sampela rot tu i stap we ol main wokman i ken bihainim long daunim o banisim ol yet long kain ol laipstail sik olsem.

Sampela ol gutpela rot we ol maining wokman i mas bihainim em long kaikai gutpela helti kaikai tasol, lukaut weit level bilong ol, mekim fisikol ekksesais oltaim, stop long simuk, kontrolim pasin long dring bia, kontrolim suga na sol i go long bodi na oltaim ol i mas go long medikol sekap long bodi bilong ol.

Vot i stat...

I kam long pes 1...

Em i askim ol ileksen opisa long stap longwe long ol pasin we i inap pasim kamap bilong gutpela ileksen.

Em i tok em bai givim ripot long polis sapos em i harim wanpela opisa i asua long taim bilong ileksen.

Em i tok long K400 milien ileksen mani long 2017 Baset, K121 milien i go long sapotim wok bilong polis na sekyuriti na K297 milien i go long ileksen operesin.

Wantaim dispela ol toktok em i laikim 2017 ileksen long:

- KAMAP gut we go na kam bilong ileksen rit (writ) i mas kamap long taim;
- DAUNIM kos bilong ileksen inap long 40 pesen;
- NOKEN yusim planti sevis provaida;
- NOKEN gat planti ileksen petisen bihain long ileksen;
- LUKIM ol meri i kamap gut na putim mak bilong ol long ileksen; na
- LUKIM ol manmeri husat hap bodi bilong ol i no gutpela i kamap na putim mak bilong ol.

Gamato i tok Komisen bai kisim ol rit i go bek long Gavman Haus long 24 Julai.

Pati we planti kendidet bilong em i win em Gavana Jeneral bai askim long kamapim gavman.

Leit Nius!Leit Nius!Leit Nius!Leit Nius!

Helikopta hariap long kisim O'Neill long Tari

I GAT ripot olsem polis i yusim fos long pasim wanpela bung we inap long kamapim hevi long Tari, Hela provins aste.

Dispela bung em pati bilong praim minista Peter O'Neill, em Pipels Nesenel Kongres (PNC) i go pas long em.

Ol i mekim rali long tokaut long polisi bilong pati long Tari taun.

Tasol taim ol sapota bilong wan

wan kendidet i kamap na i kros pait long ol yet, dispela kros bilong ol klostu i kisim Praim Minista.

Polis i yusim tiages long rausim dispela ol manmeri.

Long dispela hevi, singaut i go long wanpela helikopta we i karim tim bilong Sif Seketari Isaac Lupari we i gat Sif Iktoral Komisina Patilias Gamato, Polis Komisina Gari Baki na Ami Komanda Gilbert Toropo

long Hailans rijon i mas lusim ol na go hariap long kisim O'Neill.

Potograpa bilong Wantok Niuspepa Nicky Bernard i stap long dispela tim na i konfemim dispela hevi.

Polis komanda bilong Hela Michael Welly i konfemim dispela hevi tu.

Ol PNC opisa i tok em i no bikpela hevi na i tok i liklik hevi namel long ol sapota.

Mekim na Save

BRET

Sapta 2
...moa yet long hap 1 (BRET)
Kaikai bilong givim strong

Tok I go pas
Long sampela graun olsem Palestain na Yurop, wit na outs na bali na rai em I kaikai bilong ol long olgeta de olsem kaukau na taro na banana long Papua Niugini, na rais long Esia.

Ol I gat kain kain rot bilong kuim wit na outs na bali na rai. Wanpela rot em I olsem: Ol I brukim I kamap plaua na ol I tanim wantaim gris na wara, na bihain ol I kukim kamap bret.

Tok bilong kain kain bret
Insait lng wit na long bali na long rai tu, I gat wanpela kain marasin bilong holim pas plaua, taim yu kukim. Long kon na rais na sogom I no gat. Long taro na kaukau na saksak I nogat. Sapos yu memeim kaukau na bihain kukim o sapos yu wokim plaua kon na bihain yu tanim wantaim wara na kukim, orait, sapos yu kukim long stov I go drai olgeta, orait, taim yu katim, bai em I bruk bruk. Long wit I no olsem: Em bai pas na I stap olsem bret.

Olsem na sapos yu laik kukim bret wantaim plaua kon, na plaua kaukau, na saksak, em I gutpela. Tasol yu mas tanim wantaim plaua wit. Mekim olsem, bai marasin insait long plaua wit I holim pas arapela kaikai tu na olgeta bai stap olsem bret.

Taim yu laik kukim bret, yum as I gat sampela samting olsem stov, na yis, na plaua. Nau mipela I laik toktok liklik long dispela.

Stov bilong kukim bret
Ol man I no sve kukim plaua long sospen wantaim wara Nogat. Ol I wokim narakain ples bilong paia. Em I gat namel bilong en olsem bel. Paia I hat ausait. Ol I putim dis wantaim plaua I go insiat, aia I hatim, tasol paia yet I no holim dis.

Sapos paia I holim dis, bai plaua I paia na I no inap tan gut. Orait, paia I no holim dis wntaim plaua, olsem na plaua I save stap longpela taim liklik insait long bel bilong stov na bihain tasol bret I tan.

Paia I mas hatim tru skin bilong stov, inap bel bilong en I hat gut. Olsem na ol I save wokim stov long strongpela samting olsme ston na graun. Ol I save wokim long stongpela ain tu, ol I kolim kas ain.

Sapos yu laik wokim wanpela giaman stov tasol, orait, yu ken wokim long olupela dram bilong kerasin. Yu ken wokim liklik stov long 20 lita dram (em I 4 galen dram), na bikpela stov long 200 lita dram (em 44 galen). Lukim long piksa.

Lukim gen long neks isu insait long wik I kam (Tok bilong wokim stov long dram)



ELC Mumeng meri kamapim gutpela piksa

Paulus Tali i raitim

MOA long 500 meri long Evanjelikal Luteran Sios (ELC) long Mumeng, Morobe provins i kamap long wanpela spesel lotu long las Sande bilong givim sapot long ol meri husat i wok skul na wok insait long sios.

Long dispela taim tu, ol meri i putim aut 5-yia developmen plen bilong ol long distrik.

Reveran Elyamas Bakung, hetman bilong Evanjalisim Di-patmen bilong sios i ges spika long dispela bung.

Roy Miringke, Nesenel Iven siaman, ELC PNG Yut Dairekta

Robert Martin na Luluan Kai na Rosemary bilong opis bilong ol meri long ELC PNG i bin stap tu long dispela bung.

Reveran Bakung i tok em i gutpela long lukim ol meri i kisim tingting long mekim ol wok bilong sapotim ol meri husat i no mekim planti nois tasol i soim tok bilong God long wok na skul bilong ol.

Long 5-yia developmen plen, ol meri i statim long 2014 na Bakung i tok i amamas long ol i kamap wantaim dispela plen. Em i tok wantaim dispela plen ol i ken mekim gut wok bilong ol na i ken save long mak ol i stap long en long wok bilong ol.

Dispela plen bilong ol em Visen 2020 ELC PNG.

Em i tok wantaim dispela tu-pela gutpela tingting na plen ol ELC meri long Mumeng i go pas long ol arapela grup long provins na kantri tu long wok bilong ol.

“Mi olsem Seketeri bilong Evanjalisim mi laik tok amamas long gutpela wok yupela ol lida insait long distrik i holim han na strongim wok bilong sios,” Bakung it ok.

“Yupela ol lida i mas wok wantaim ol Kristen manmeri long nem bilong Bikpela Jisas bai wok i ken go strong long distrik na provins wantaim.”

Bakung i givim tok sori bilong Cathy Mui, husat i Nesenel Dairekta bilong ELC PNG meri no kamap bikos long sampela hevi tasol i salim amamas bilong em i go long ol.

Lida meri bilong NGO, Rose Mary i tok em i save givim trening long ol meri long kain proyek olsem na i amamas long lukim ol meri ELC long Mumeng i mekim wok stret.

Mary i save givim trening long ol meri long nesenel level i go daun long distrik na peris level.

Bakung i amamas tu na i tok tenk yu long distrik presiden Pasto Tau Bingtau na Tara long go pas long ol meri long kamapim dispela plen.

Votim lida husat bai makim yu



Ol meri long olgeta setelmen insait long NCD i amamas tru na kisim grup poto wantaim Embeseda bilong Yunaitet Stet ov Amerika long Papua Niugini, Solomon Ailan na Vanuatu, Catherine Ebert-Gray, long wok-sop bilong Wimen Patisipesen long Ilekse long Pot Mosbi.

Poto; Benorah C Hesehing

Benorah C Hesehing i raitim

ILEKSEN em i taim bilong ol lida wantaim gutpela driman bilong bihain taim bilong wan wan ilektoreit long askim ol pipel long makim ol i kamap lida bilong ol.

“Em i taim nau, long ol pipel i makim lida husat bai harim wari bilong ol na makim ol long narapela gavman.

“Mi wanpela meri olsem yu; taim mi laik makim lida, mi save tingim helt, edukesen, famili sekyuriti na wankain luk-

luk long ol man na meri,” Embeseda bilong Yunaitet Stet ov Amerika long Papua Niugini, Solomon Ailan na Vanuatu, Catherine Ebert-Gray i tok.

Em i tok olsem, long lukim ol meri i wok insait long demokretik gavman, ol i mas stap long bisnis, politiks na ol narapela bikpela wok tu.

Embeseda, Gray, i tok tu olsem, US Embesi long Pot Mosbi i stap long strongim raits bilong ol meri; nau em ileksen taim na ol i laik helpim ol meri long stap insait long olgeta ileksen wok.

Dokta Orovu Sepoe, bikmeri long jenda na politiks i tok olsem yumi mas tingting long putim planti meri i go insait long gavman long dispela ileksen.

“I bin gat liklik rong wantaim ol meri memba lo palamen longtaim; tasol yumi ken mekim gut moa, sapos yumi gat planti meri olsem palamen lida long nupela gavman.

“Sampla meri i resis long dispela ilekesen; na em ol strong-pla meri long wokim dispela resis wantaim ol man, long kantri we ol man tasol save go

pas long wok politiks,” Dokta Sepoe i tok.

Dokta Sepoe i tok tu olsem ol pipel i mas save olsem ol tripela vot bilong ol wantaim i impoten.

Olsem na ol i mas makim gut lida wantaim gutpela driman husat bai pinisim gut dispela resis na kamap lida bilong ol long gavman.

Mista John Gana long Hope Worldwide, i tok tu olsem pipel i mas makim lida husat bai bringim gutpela sindaun bihain taim na i no bagarap.

Kisim wok bai mekim yu wok gut

Benorah C Hesehing i raitim

PLANTI ol meri long kantri tude i gat strong na i mekim ol bikpela wok ol man tasol i save wokim bipo.

Ol dispela meri save gat bilip long ol yet olsem ol i ken wokim olgeta samting ol i laikim na inap long mekim gut wantaim bel bilong ol.

Racheal Apisai, 25, bilong Is Nu Briten ,em wanpela bilong ol dispela kain meri.

Em i wanpela bilong ol 12 greduet bilong ol 2017 Bridsing Kos bilong Ekraf Mentenens Enjinia.

Mis Apisai em wanpela Difens Fos soldia meri na gat namba olsem Lens Koprul Api-

sai. Em i lusim wok bilong em na joinim Difens Fos long 2014, taim em i luksave olsem wok em samting yu mas laikim na fit gut long wokim wantaim bel bilong yu.

Na difens wok i gutpela moa long em.

Em i tok olsem: “Wokim wok na skul namel long ol planti man i hat; tasol yumi mas no ken pret, dispela bai mekim yumi strong moa long wok laip bilong yumi,” Mis Apisai i tok.

“Dispela pepa mi kisim em makim stat bilong wok bilong mi na bai mi skul moa yet long dispela eria.

“Bihain long olgeta hatwok, mi laik tok tenkyu long papa God long mekim isi long mi.

“Nau mi lukluk long sevim PNG Difens Fos gut wantaim ol na wok bilong mi.

“Mi laik givim skul tok long ol yangpela meri long lukluk go moa yet na lukim tru ol husat; no ken bisi long wanem man bai tingting long yu,” em i tok.

Mis Apisai i pinis long Kokopo Sekenderi Skul, igo mekim Ilek-troteknoloji long Pot Mosbi Teknikol na wok long SP Bruri, Lord & Co na bihain em wok olsen junia anaunsa long PNG FM taim ol i kisim em long difens fos.

Em i lukluk nau long go long namba tu trening long Niu Zilen wantaim ol narapela wan wok bilong em.



Lens Koprul Apisai i salut long Komanda Asil Is, husat i givim Setifiket bilong em long Bridsing Kos bilong Ekraf Mentenens Enjinia long greduesen long Mande, dispela wik.

The Giluwe Vius

To contribute to this page, contact MY Media & News Agency on mobile: 70747450

G. Andandi – Qualifies to represent his Tambul-Nebilyer population

MR. Gabriel Andandi is contesting the Tambul-Nebilyer Open Seat 2017. He is endorsed and nominated by more than 2,000 students from Tambul-Nebilyer in PNG and abroad because Gabriel assisted them since 1997 and believe Gabriel can do more if he wins this election.

Many people know Mr. Andandi well given his school fee assistance towards more than 3,000 students since 1997. Few do not know his background. This article outlines Mr. Andandi's profile to the people of Tambul-Nebilyer to know well their new leader.

Mr. Gabriel Andandi is from Laulga Tribe, Lower Kagul District of Tambul-Nebilyer Electorate, Western Highlands Province.


He attended Keripia Community School in the Lower Kagul district and passed the National Exams to do Grades 7 - 10 at Fatima High School in WHP (now Jiwaka province) from 1979 to 1982 and continued onto Aiyura National High School in the Eastern Highlands to do Grades 11 to 12 among the top students from throughout the country when PNG had only four National High Schools.

He successfully completed with a Higher School Certificate and accepted by the University of Goroka in 1985 where he successfully completed Diploma in Teaching Secondary (with Credit) in 1986.

In 1987, he won a teaching position as a Secondary School Teacher at Malabunga Secondary in Morobe Province and later at Tusbab Secondary School in Madang and taught Grades 7-12 till 1990. During the term, he was planning, teaching, assessing and reporting to Provincial Education Board on student performance, coordinated and reporting to University of Goroka on the performance of students doing teaching practice and an active member of the Syllabus advisory Committee.

In 1991, he enrolled at the University of PNG in Port Moresby for further studies and successfully completed in 1993 and awarded Bachelor of Education. He joined PNG National Commission for UNESCO from 1993 to 1998 as Programme Officer Education and developed and implemented the UNESCO Education Programme in partnership with Department of Education and other agencies. Other tasks include developing and writing up proposals for funding from UNESCO headquarters in Paris. This resulted in securing US\$200,000 for schools in the highlands affected by frost in June 1995.

He also coordinated all APEC and



MR. Gabriel Andandi is contesting the Tambul-Nebilyer Open Seat 2017.

Commonwealth Education Programmes and activities in PNG and facilitated training for government and churches on issues relating to education, science, communication and informatics.

During that period, (1995 – 1997), he was the Part-time Lecturer at the University of PNG teaching Mathematics, Education Curriculum, Statistics and Economics where he developed the Mathematics and Education curriculum programme for the academic year and planned, lectured, assessed and reported to Head of Faculty on the students' academic performance.

Realizing that education is important and can land him on better jobs, Gabriel Andandi enrolled at Monash University in Australia on February 1999 for Masters in Human Resources Management and completed successfully in November 2000. He returned back to PNG and worked with the Department of Education from January 2001 to February 2002 as Superintendent Operations: Policy Research and Communication, coordinating all operational matters related to the division including planning, budgeting and expenditure, supervising all operational staff within Policy and Research divi-

sion and organizing and coordinating National Education Board meetings.

The best part of his employment came when he joined UNICEF PNG in February 2002 to April 2008 as Education Programme Officer: Coordinating the Promoting Girls' Education and Child Friendly School Projects. He developed the UNICEF Education Programme for 2003 – 2007 UNICEF/Government of PNG Master Plan of Operations.

He mobilized at the highest level and established Universal Basic Education Task force chaired by Secretary for Education, established national and provincial Girls' Education Committees in seven provinces and established 200 child friendly schools.

One of his major contributions came when he mobilized and created aggressive awareness campaign at the community level on the importance of sending girls to school which resulted in bringing back 1,900 girls to school.

He wrote project proposals to private sector and development partners to support education programmes and activities which resulted in more funding to support child friendly schools in respective provinces.

This ensured he created and established network with provincial education offices, UN agencies, churches, NGOs, Education Department, government agencies and other development partners and effectively implemented targeted programmes.

Gabriel's contribution was extensive in scope with the primary aim to ensure program identification, securing of funding and management when implementing identified projects and reported the results to donor agencies.

Gabriel is currently self-employed and successful businessman since April 2008 and Managing Director of Norman Finance Ltd which has

branches through the country. He conducts other consultancy work given special skills and talents he acquired from his education and job experiences over the past years including;

- Experienced in project development, planning, implementation, monitoring and reporting to donor partners on certain programmes and activities
- Experienced in working in teams with international organizations like the UN (UNESCO, UNICEF, UN-AIDS, UNDP) and in partnership with AusAID, NZAID, EU and other partners with the paramount intention of achieving EFA goals.
- Extensive understanding of the education system in Papua New Guinea, schools and people's perception on development issues like gender and HIV/AIDS
- Experienced in developing annual workplans based on key programme objectives and able to develop strategies in order to achieve key outcomes
- Experience in writing annual reports, mid term reviews, project proposals and donor report writing
- Experienced in working with school children and understanding the main causes of why they dropout of school, especially the girl child
- Able to develop strategies to ensure out of school children to enroll in schools to realize the Millennium Development Goals (MDG), especially goals 2 and 3
- Able to negotiate funding from donor partners and able to manage funds for programme implementation at national and provincial level
- Extensive knowledge on how to create networks with key government agencies, donors, community, churches and NGOs for effective programme implementation
- Excellent understanding on problems related to gender inequalities in Papua New Guinea and able to create advocacy at the highest level and awareness in districts/communities.
- Extensive knowledge on building capacity and training at the provincial and district level especially in the areas of Disaster management, Friendly Schools, Gender and HIV/AIDS
- Able to work in a multi cultural environment and able to understand peoples background and cultures

Computer literate: Basic PC skills, Windows, Power Point, Excel, PageMaker, Email, Internet

Gabriel Andandi's highest career achievements include;

- Bringing 1,900 girls back to school that were out of school for various reasons like school fees and early pregnancy.
- Implementing the Girls Education programme has given the passion to speak on gender issues which is a big concern for Papua New Guinea. People seem to listen to males advocating for more girls to go to school and more women in leadership positions.
- Incorporating Child friendly schools (CFS) concepts into the primary teachers college curriculum. One of the biggest achievements in institutionalizing CFS within education system. The unit was taught in 2009 academic year
- Developing a community based strategy where the whole community pays for children's school fees regardless of you having a child in school. This was initiated because one of the main reasons why children dropout is school fees
- Supported 30 primary schools in six provinces in developing the School Improvement Plans, to negotiate funding from development partners and individual countries.

Born on May 10, 1964 at Wambul Village, Lower Kagul district, and before the political independence of Papua New Guinea, Gabriel Andandi experienced well the post and pre PNG political, economic and social conditions.

He travelled the world given his UN career engagements and experienced multicultural environment with clear understanding of geopolitical issues concerning our region and world today and how it affects PNG.

Given his vast experience and educational background, Mr. Gabriel Andandi is firm that EDUCATING OUR YOUTHS TODAY WILL PREPARE FOR A BRIGHT FUTURE. So more than 2,000 Tambul-Nebilyer students in PNG and abroad endorsed and nominated Gabriel Andandi to contest the Tambul-Nebilyer Open Seat with a motto; "A Visionary Leader To Have An Educated Population"

The Tambul-Nebilyer students in PNG and abroad appeal to their parents, relatives and the people of Tambul-Nebilyer to consider the education of their children in the future and vote for Gabriel Andandi to be the Member of Parliament representing the people of Tambul and Nebilyer in the next five years and beyond.



Norman Finance Limited
 P.O. Box 891, Waigani, National Capital District
 Phone: (675) 326 3281, Fax: (675) 326 3281
 Email: gandandi@hotmail.com



GST# 18351

Interest rates are reasonable:

- We offer
- Low Interest Rates
 - Efficient Services
 - No Service Fees
 - No Default Fees
 - No Processing Fees
 - Rebate on Early Settlement
 - Service within 36 Hours

A Subsidiary of Universal Service Limited

Las wik nau bilong skelim gut tingting na makim trupela lida

SAPOS yu askim wanpela kendidet watpo em i laik resis long nesenel ileksen, bai em i tok em i laik bringim senis i go long ilektoret olsem na em i putim nem long resis. Sampela bai i tok i no gat developmen i kamap olsem na ol i laik bringim developmen.

I gat ol gutpela na trupela manmeri i resis long kamapim gutpela sindaun na i gat ol dispela lain husat i belhat na i resis.

Ol lain i belhat na resis i gat belpen long gavman o long siting memba olsem na ol i resis long win na bekim dinau.

Long Mosbi i gat sampela bilong ol dispela kain kendidet i stap ples klia. Planti bilong ol i bin holim wok long gavman bipo.

I gat ol lain husat i belhat long gavman i bin kotim ol na ol i pinis long wok o i no kisim mani bilong ol, olsem na ol i laik bekim dinau. Sapos ol i win na go long palamen bai ol i traime bekim dispela wari bilong ol.

Ol dispela lain i no gat trupela polisi o plen bilong developim ilektoret na kantri. Ol i tingting long ol yet.

Mobeta ol pipel i opim ai na luksave long dispela kain kendidet. Planti bilong ol i toktok tasol na ol pipel i bilip. I no gat gutpela plen bilong ol long kamapim tru wok long bihain taim.



Dispela wik i las wik nau long kendidet i kempen na grisim ol pipel long givim vot long ol.

Planti kain kain gris toktok i kamap long maus bilong ol lida bilong pati na ol kendidet yet long ol gutpela wok ol i bin

mekim o ol bai mekim sapos yumi givim vot long ol.

I gat wan wan pati na ol kendidet i mekim ol toktok long wanem kain polisi ol i gat na ol wok ol bai mekim long taim ol i winim ileksen.

Long planti ples, ol pipel i amamas long lukim ol kaikai na dring na mani ol kendidet i karim raun na skelim i go long wan wan haus lain. Ol i save olsem taim bilong ileksen em i taim bilong fri kaikai na kisim mani.

Dispela pasin i wok long kamap tu long ol bikpela siti olsem Pot Mosbi.

I gat mani i wok long kapsait long putim ol edvetaismen long niuspepa, redio na televisen na mobail fon. Na i gat tu ol kain kain nius i kamap long sosesel media.

Sampela i gutpela na sampela i giaman toktok tasol.

Dispela ileksen i lukim bikpela senis i kamap long ol rot bilong kempen.

Ol politikal pati i putim strongpela toktok egensim ol birua bilong ol long ol edvetaismen long niuspepa. Em i nupela pasin bilong daunim ol birua politikal pati.

I gat bikpela wok i kamap long mekim dispela ileksen i seif na ol pipel i fri long votim husat kendidet ol i bilip bai inap helpim wan wan ilektoret long kantri.

Gavman i putim bikpela mani tru long wok bilong sekuriti long ples bilong vot na long ples bilong kaunim ol vot.

Yumi hop dispela ol samting bai helpim wok bilong 2017 nesenel ileksen i ran gut na PNG i ken lukim wanpela gutpela gavman i kamap.

Em i las wik bilong skelim gut tingting na makim ol trupela lida.

Kantri bilong yumi i nidim ol gutpela strongpela Kristen lida husat bai i no inap pret long mekim wok long stretpela pasin.

Taim bilong ol meri long Sanap strong

Taim bilong ileksen i kam klostu nau, na em impoten long ol meri long toktok na wok strong long lukim gutpela lidasip long narapela 5-pela yia.

Long ol pipel husat bai vot go long ol wokman na meri long ileksen taim, ol kendidet na ol lain i save strongim gutpela lidasip wok, ol meri long kantri i gat bikpela wok long mekim long lukim gutpela lida i win na strongim rait na sans bilong ol meri.

Longtaim i kam nau, Yunaited Steit(US) Embesi save putim bung bilong ol meri long lukluk long ol strong, gutpela tingting na wari bilong ol meri long kantri.

Long dispela yia, bung i kamap long Yunivesiti ov



Goroka (UOG) na ol meri i bin tokaut long ol samting ol i ken wokim long dispela taim bilong ileksen.

Mi amamamas tru long gutpela tingting na toktok bilong ol meri long dispela bung na lukim ol meri i resis long dispela ileksen.

Planti bilong ol dispela meri resis long dispela ileksen i gat gutpela save na lidasip long ol wok olsem bisnis, na ol gavman wok tu. Long dispela ileksen, PNG

Ilektorel komisen bai putim lain bilong ol meri yet long go vot na em i gutpela.

Em bai helpim ol meri gut tru long vot gut, fri na nogat poret na lukim planti meri kisim lidasip wok.

Yunaited Nese (UN) ripot i tok 'Ol meri long planti hap long wol i no save stap long wok politiks bikos long nogat gutpela edukesen na ol wei bilong lukim ol meri long pasin kalsa bilong wan wan ples'.

Kantri bai no inap kamapim gutpela demokrasi sapos hap bilong populesen i no inap soim demokretik rait bilong ol.

Olsem na ol man husat bai wok long ileksen taim, mas wok strong na larim ol meri i vot gut long laik bilong ol yet.

Ileksen em sans bilong yu long makim gutpela lida na bai yu stap bihain long 5-pela yia olgeta long kisim dispela sans gen.

Yu mas makim lida husat bai bringim gutpela sidaun long dispela ol yia, na ino man husat bai bringim bagarap long yu.

Ol pipel i mas wok bung wantaim long lukim ol meri i stap insait long ol ileksen wok na vot gut long laik bilong ol yet, long lukim gutpela lidasip wok i kamap long kantri long narapela 5-pela yia long kam.

Catherine Ebert-Gray U.S. Embeseda long Papua Niugini, Solomon Ailan na Vanuatu

Embesi bilong Yunaited Steit ov Amerika (USA), Pot Mosbi

Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: editorial@wantokniuspepa.com

Pe bilong wanpela yia 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga

Editor Frieda Sila Kana

Printed and Published at: Dove Travel Building, Level 2, Section 24, Lot 25, Angau Drive/ Lahara Avenue Junction, Boroko

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

St Martin de Porres gat nupela Asosiet

Nicky Bernard i raitim

ST Martin de Porres long Morata insait long Pot Mosbi i gat 9-pela nupela Asosiet o ol wok manmeri bilong helpim ol tarangu.

Long Sande namba 4 de bilong dispela Mun, St Martin de Porres sios long Morata i bin mekim wanpela bikpela misa long blesim ol dispela 9-pela manmeri. Insait long dispela 9-pela i gat 5-pela meri na 4-pela man i kisim bles long Fr Rozario Menezes husat em i wanpela bilong ol Montfort Fada i lukautim Pot Mosbi daioses.

Fr Rozario, i tok wok bilong ol dispela 9-pela manmeri em

long helpim ol tarangu husat i laikim helpim na tu long go raun na pre long ol lain long haus sik, haus kalabus na ol liklik Kristen grup long hap ol stap.

Fr Rozario i tok dispela ol 9-pela manmeri i kisim skul long tupela yia olgeta na long Sande em blesim na givim strong long ol long mekim wok helpim long ol manmeri.

St Martin de Porres i bin pulap tru long ol manmeri na pikinini long witness long ol dispela 9-pela manmeri long kisim blesing na stap strong. Ol famili bilong ol dispela 9-pela manmeri tu bin stap long luksave long wok ol bai mekim long helpim ol tarangu man-



Fr Rozario i tokaut long wanem toktok i stap insait long dispela nupela tokpisin buk long ol manmeri na pikinini long haus lotu.

Ol foto: Nicky Bernard

meri na pikinini.

Ol dispela 9-pela bai lainim liklik moa skul long 30-pela de

bipo long ol yet i ken karim wok raun long lukluk long turagu manmeri na pikinini.

Luteran sios gat redio stesin

Joyce Huanjo i raitim

KRISTEN Redio 89.1 FM The Voice of the Gospel, em i nupela redio stesin bilong Luteran sios.

Sios Kaunsil bilong Evenjelikal Luteran Sios (ELC) bilong Papua Nuigini i opim dispela redio stesin bilong sios long las wik Fonde.

Redio stesin i stap long Martin Luther Seminari long Lae na i wok long brodkas i go aut long Lae tasol long frikuensi 89.1.

Long wankain taim, dispela stesin i go long intanet na ol manmeri we arapela ol manmeri long wol tu i ken harim.

Dedikesen bilong studio na komunikesen bilding i bin kamap long las mun.

Redio stesin i no gat planti wokman bilong long wanem em i nupela projek bilong sios.

Redio i gat ol volentia sumatin bilong Martin Luther Seminari na Yunivesiti bilong Teknologi long Lae husat i save helpim redio jenelis Joyce Huanjo long mekim ol redio program na arapela wok.

Wok brodkas i save kamap long Fraide i go long Sande na long Mande i go long Fraide i gat ripot bilong ol program tasol.

Het bisop bilong ELC PNG, Jack Urame I bin opim dispela stesin, na em i tok, dispela bai i wanpela rot we Luteran sios i ken bringim gut nius bilong Kraisi i go long pipel.

Het bisop i tok namel long planti salens sios i bin bungim, dispela i no bin pasim ol wok long go yet na dispela em i wanpela bilong ol driman bilong sios na sios kaunsil we nau i karim kaikai.

Longpela taim wokman bilong Luteran Komunikesen Senta, Jerry Daniels i tok tenkyu i go long Mision Einwelt long Je-



Het bisop bilong ELC PNG, Jack Urame

mani na KED long sapot bilong ol long mani wantaim helpim Spesel Projek Opis, Asset Menesmen Yunit bilong ELC PNG, Sios Patnasip Program bilong trenim ol volentia na ol lain husat i bin sapotim dispela wok.

Daniels i tok olsem ol Kristen manmeri i mas stat liklik na bihain ol i ken mekim wok i go kamap olsem ol arapela redio stesin nau i stap.

Komunikesen wokman Daniels i tok Bisop Dokta Wesley Kigasung husat i dai i bin kirapim tok bilong ELC PNG long ol i mas i gat wok bilong redio stesin na sios Kaunsil i bin pasim tok long yia 2006 na long 2007 bisop i dai.

Bisop Gigere Wenge husat i kisim ples bilong em i bin strongim tok long kamap bilong dispela redio stesin.

Wanpela lei man Thorsten Krafft, i wok olsem tenikel edvisa long projek.

Montfort i autim tokpisin buk

Nicky Bernard i raitim

MONTFORT Misi-nari long Papua Niugin i autim tok pisin buk bilong ol, ol kolim long "Trupela Divosen i go long Santu Virgo Maria".

Dispela buk i gat long tokples France na Inglis tasol ol lain long Montfort i kisim na tainim i go long tok pisin long helpim ol manmeri bilong Papua Niugini long ridim na save gut.

Fr Rozario Menezes long Montfort SOSAITI long Pot Mosbi i go pas long stretim dispela buk long go long tok pisin. Em i lukim olsem dispela buk bai helpim tru ol manmeri long strongim bilip bi-

long ol long pre na lotu.

Em tok taim ol tanim dispela buk pinis i em kisim i go long India na ol prinim long hap, em i kisim wanpela kopi bilong buk na givim long papa Santu olsem presen bilong Montfort long Papua Niugini. Fr Rozario tu i givim wanpela billum i go wantaim buk long papa Santu olsem presen i kam long ol mama long Morata husat save lotu long St Martin de Porres olsem hap han bilong Montfort long Pot Mosbi.

Dispela nupela buk long tok pisin Trupela Divosen i go long Santu Virgo Maria ol salim long K10 na yu ken kisim kopi bilong buk long Morata peris

Bilip manmeri bung long sefti bilong sumatin

Joyce Huanjo i raitim

SEKYURITI na sefti i bikpela samting long Lae, Morobe provins.

Martin Luther Semineri i stap long arere bilong siti na planti taim i save bungim hevi bilong ol raskol na ol stilman.

Sekyuriti banis bilong dispela skul i olupela na i

bruk na ol manmeri (planti em ol drag bodi) i save go insait long semineri na brukim haus bilong ol tisa na domitori bilong ol sumatin na stilim ol samting.

Long stretim dispela hevi, menesmen bilong semineri na ol bilipmanmeri i bung long wanpela lotu long bungim mani na

sanapim nupela sekyuriti banis.

Ol i askim ol arapela bilip manmeri, bisins haus na ol lida long givim sapot bilong ol.

Menesmen i tok long stil na raskol pasin, semineri i lusim ol samting i kost moa long sampela tausen Kina.



Yut, Meri na Famili

Pastor Barbara Lunge

Ol lukaut pikinini man bilong God

Yupela ol pikinini man God i kisim na lukautim. "Taim God i no mekim graun i kamap yet, na em i makim yumi pinis long pas wantaim Kraisi, bai yumi ken i stap holi. Bai yumi ken i stap stret-pela manmeri na i no gat asua long ai bilong en." Efesus 1:4-5

Ileksen na makim man bipo yet i minim olsem, "long tingim pinis pastaim long em i kamap" na dispela kain pasin em i makim tingting bilong God we bai kamap bihain long ileksen.

Ileksen em i laik bilong God insait long Kraisi long i gat pipel bilong em yet, we bai gat laip wantaim em na mekim ol spesel wok we i stap long tingting bilong em.

"Long wanem ol man bipo tru God i tok pinis long kisim bek ol, em i makim ol tu, bilong kamap wankain olsem Pikinini bilong em. Olsem bai planti pikinini i ken i stap, na Kraisi i ken i stap namba wan brata bilong ol. Na dispela ol man bipo em i makim ol, em i singautim ol tu. Na dispela ol man em i singautim ol, em i kolim ol stret-pela man. Dispela ol man em i kolim ol stret-pela man, em i givim gutpela laip na biknem bilong em yet long ol." Rom 8:29-30.

God em i spirit, na olsem em i salim spirit bilong em long kotim ol man long bel bilong ol long go bek long em yet.

"Yumi stap lain manmeri bilong God, olsem na yumi mas harim tok bilong Holi Spirit. Em i tok olsem, "Nau sapos yupela i harim maus bilong mi, orait yupela i no ken pasim strong bel bilong yupela, olsem bipo ol tumbuna bilong yupela i mekim long taim ol i bikhet na sakim tok bilong mi. Ol i stap long ples drai na ol i traime mi." Hibru 3:7-9.

Olsem ol pikinini bilong Israel i bin strongim bel bilong ol long ples drai, inap long 40 yia long ol i no harim spirit bilong God, ol pikinini bilong God we em i makim ol insait long spirit tu i mas putim ia na harim toktok bilong spirit bilong God na bihainim.

"Tasol sampela manmeri i kisim em, em ol lain i bilip long nem bilong em. Na em i givim namba long ol bai ol i ken kamap pikinini bilong God. Ol i no kamap pikinini bilong God long blut bilong papamama, o long laik bilong bodi, o long laik bilong man. Nogat. God yet i mekim ol i kamap pikinini bilong em" Jon 1:12-13.

"Nau yupela i stap pikinini bilong God. Olsem na God i salim Spirit bilong Pikinini bilong en i kam pinis long bel bilong yumi na Spirit i mekim yumi i singaut long God olsem, 'Aba, Papa.'"

Pasin bilong laikim namel long papa Bikpela God i mas kamapim pasin bilong felosip na stap klostu wantaim em. Yumi bai lukim planti gutpela samting we yumi no save lukim bipo insait long spirit laip bilong yumi.

"Tasol taim i laik kamap, na nau i kamap pinis, na olgeta man i laik lotu tru bai ol i lotu long Papa long strong bilong Holi Spirit na long pasin i tru. Na Papa i laikim tumas bai ol kain man olsem i mas lotu long em. God em i Spirit. Na ol man i lotu long em, ol i mas lotu long strong bilong Holi Spirit na long pasin i tru." Jon 4:23-24.

I no gat mak insait long spirit bilong God. God bai mekim olgeta samting long strongim pasin bilong stap olsem pikinini man bilong em inap yu go bikpela.

Olsem nau yupela i stap olsem ol pikinini man bilong God yumi gat ol samting we God i gat na yumi papa long ol samting bilong God wantaim Kraisi Jisas. Olsem ol pikinini man nau yu bilip na mekim senis we bai mekim olgeta samting God i kamapim i mas tanim i go bek long God na lotu long God papa bilong yu, man i kamapim yumi!!

Rural skul sumatin gat stail long amamsim WED

JAMES G. KILA i raitim

MASKI skul bilong ol i stap longwe tru long bikpela taun na siti, tru tumas planti ol rurel skul insait long Papua Niugini i gat planti gutpela stori bikos ol i save yusim wanem liklik samting ol i gat long kamapim ol naispela selebren long amamasim ol tisa na wanskul bilong ol.

Planti ol skul selebren i save soim tru kala na stail bilong PNG stret, na dispela i no giaman giaman o potokopi nabaut olsem ol skul long taun na siti i save wokim. Ol rurel skul save soim stret pasin na kalsa bilong rurel PNG bikos ol i stap klostu long envairomen em bus, graun, wara na solwara.

Long las wik Tunde, mi bin stap long Dein praimer skul long Raikos distrik long Madang provins na mi lukim ol rurel pikinini o sumatin i luksave long Wol Envairomen De (WED). Na tru tumas mi amamas long kain ol pilai, danis na stringben song ol sumatin i kamapim long luksave long dispela intenesenel de we planti lain long wol (ples graun) tu i luksave long en.

Het tok bilong WED long dispela yia em "Appreciate and conserve our land and our sea"...Long Tok Pisin bai yum tok, Amamas long yusim na lukautim graun na solwara bilong yumi long arapela long bihain taim, i ken yusim gen.

Ol tisa wantaim ol sumatin long wan wan gret i kamap wantaim ol projek bilong ol yet long soim long WED long Tunde. Ol sumatin i droim ol piksa na posta we i tokaut long gutpela was na rot long lukautim bus, graun, wara na

solwara em envairomen. Ol i putim kamap ol danis, ol askim na bekim (riddle) long envairomen na tu pilai stringben na singsing long amamasim dispela de.

Long moning taim long Tunde, Jun 6, bihain long olgeta sumatin i klinim gut skul graun na rausim ol pipia, olgeta i sanap long asembli, na wanpela duti tisa meri i askim long sampela voluntia long go long fran na paitim gita long ol bai singim ol lotu song. Dispela em divosen o liklik lotu we i save kamap long olgeta asembli de long dispela rurel praimer skul.

Duti tisa i bin askim tripela taim long ol apa praimer studen long gret 8 na gret 7 long go long fran na paitim gita long go pas long singsing, tasol no gat wanpela i voluntia long go long fran. Ating ol i mas sem?

Samting olsem tripela minit bihain, mipela olgeta husat i bin stap long dispela taim i guria stret long lukim tupela sotpela sumatin kris-mas bilong ol i mas 8 o 9 i wokabaut isi tasol i go long fran na kisim gita. Bihain narapela lowa praimer sumatin i bihainim ol i go.

Sais bilong ol dispela tripela sumatin i paulim ai bilong planti long mipela bikos ol luk olsem ol liklik mangi . Tasol tru tumas, taim ol i paitim gita na kamapim pairap long string, musik bilong gita i pairap nais tru.

Ol tripela sumatin ya nem bilong ol em Yutikas Dogen na Stanley Naparo long gret 3 na Neville Kembe bilong gret 4A long Dein praimer skul.

Tripela sumatin ya i pilai gita nais tru na olgeta skul sumatin long asembli i singim ol naispela lotu song

na liptimapim nem bilong God long kamapim gutpela envairomen olsem bus, graun, wara na solwara em yumi ol pipel bilong PNG save amamas long en.

Dispela WED selebren long Dein praimer i bin kamap nais tru bikos ol wan wan klas i putim kamap ol danis na ekt na tu ol tisa i go pas long ol sumatin long soim ol enimal danis. Sampela long dispela em ol enimal song bilong narapela provins em ol tisa i skulim ol sumatin na ol i mekim nais tru.

Dein praimer skul i gat moa long 500 sumatin, na i gat 15 tisa bilong planti hap bilong PNG i go wok na stap long hap.

Het tisa bilong Dein praimer em Simon Douglas, na dispela strongpela man i kamapim planti gutpela senis na developmen long dispela rurel skul long Raikos distrik.

No gat rot i go long Dein praimer skul na planti ol arapela skul insait long dispela eria long Raikos. Ol tisa save yusim moto bot o dingi long go kam long Madang taun long kisim skul saplai na baim ol samting bilong lukautim ol yet long stap na sevim Edukesen Dipatmen long dispela rural ples.

Ol sumatin bilong Dein praimer bihain long gret 8 save go het long wokim gret 9 long Raikos Sekenderi skul. Dispela skul i stap sampela aua longwe na bai ol i mas abrusim foa o faivpela riva pastaim long go kamap long hap.

Maski olsem i gat hevi i stap long ol rurel ples, ol skul sumatin i amamas yet long promotim kalsa na pasin bilong PNG na amamas na luksave long WED.



(Antap Poto): Tripela studen Yutikas Dogen, Stanley Naparo na Neville Kembe i pairapim gita nais tru na olgeta sumatin i singsing.



(Poto lo Rait): Ol lowa praimer skul meri i danis



(Poto lo Lef): Tisa i go pas long ol sumatin long paitim sel kokonas long mekim enimal song.



(TambloPoto): Gret 3 sumatin long Dein redi long danis kalap kalap. Ol poto: James G.Kila



K4000 a month or Negotiable!

Rainbow Units on Rent

Inside Wantok Compound with security gate

Upstairs - 2 Bedroom & 1 Study room

Downstairs - Lounch, Kitchen & Toilet/Shower facilities.

All white goods available.

Ample parking space, front lawn has best recreation area for barbaque and family gatherings.

4 units available for rent.

K4000 a month or Negotiable!

Call Word Publishing and ask for Buana Ragela on PH: 325 2500 or Mobile:70682533 to inspect the site.

Watpo taragau makim Hagen

STORI BILONG TUMBUNA

Long bipo tru i no gat wanpela man i stap long ples Eglem. Planti meri i stap long dispela ples. Wanpela taim san i kamap na i gutpela taim bilong i go long bus na painim kapul. Nau ol meri i tingting long i go bus na painim rop bilong wokim bilum. Ol i redi long go nau ol i kisim planti kaukau na i slip.

Tumora moningtaim tru ol i kirap na wokabout i go long bus bilong painim rop bilong wokim bilum. Ol meri i stat long wokabout i go long bus, ol i kamap long hul bilong maunten na skelim sampela i go long arere bilong wara em i kisim rop i go, na i lukim haus bilong wanpela pisin i stap. Meri ya i kisim dispela haus pisin, i lukim wanpela kiau bilong pisin i stap. Nau meri i kisim dispela kiau ya. Nogat, em i brukim. Nau meri i kisim dispela na kaikai.

Bihain em i kisim sampela rop na i kam painim ol wantok, na ol i kam long haus bilong ol. Em i no tok save long ol brata bilong em long em i kaikai kiau. Em i kam tasol. Na tripela mun i go pinis na yangpela meri bel bilong em i solap nau. Ol brata bilong em ol i askim em, brata yu kaikai planti na bel i solap. Meri i tok nogat.

Ol i stap i go na winim 9-pela mun. Meri i klostu karim pikinini, i pilim pen, na i mekim kain kain pasin. Em i slip long graun, rabim graun long skin bilong em, kra i na klostu i laik indai nau. Ol brata bilong em i no lukm wanpela kain pasin olsem bipo. Ol brata bilong em ol i tok, Ating em i laik i dai na mekim olsem. Nau ol i lukuk i stap na meri wantok ya i karim pikinini man. Ol meri lukim dispela pikinini man, ol i guria nogut tru long dispela pikinini man. Olgeta meri i

amamas tru long dispela pikinini man. Ol i kis long meri i karim pikinini man.

Nau ol i kisim dispela na lukautim i stap na winim 3-pela mun. Mama bilong en na brata bilong em, tupela i kisim dispela pikinini i go long gaden. Tupela i putim pikinini long as bilong diwai long ples kol, na tupela i kisim kukamba i stap.

Wanpela taragau i plai i kam sindaun long han bilong diwai, pikinini i slip long en. Tupela mama i lukluk i stap. Wantu, taragau i plai i kam daun na kisim dispela pikinini man long tupela lek bilong en na plai i go antap na sindaun long han bilong diwai. Tupela mama i bikmaus na singaut strong, tasol taragau i tok, "pikinini bilong mi nau. Mi kam kisim i go. Yutupela i go long haus bilong yutupela."

Taragau i toktok na i sindaun yet long han bilong dispela diwai. Tupela mama i kra i na tromoi stik i go antap. Tasol i no inap. Bikmaus tasol i no inap. Klostu san i go daun, taragau i tokim tupela mama: "Yutupela i go long haus, pikinini bilong mi nau mi yet kism i go."

Tupela mama i kra i sori nogut na rabim graun long pes na i kam long haus na stori long ol arapela meri olsem. Long taim mipela i go long bus bilong painim rop bilong wokim bilum, long dispela taim mi kisim kiau bilong taragau. Ating long dispela mi karim pikinini man bilong taragau yet i tokaut na kisim pikinini i go.

Ol mama i kra i sori i stap. Bihain ol i mekim pati long pikinini bilong ol yet i mekim wok long gaden bilong lusim tingting long pikinini bilong ol na i stap nating.



Taragau i kisim dispela yangpela boi i go long bus na i putim long hul bilong diwai. Taragau i go raun long bus na kilim kapul, kisim i kam na givim pikinini boi bilong en. Oltaim taragau i mekim olsem i go na yangpela boi i kamap bikpela. Nau pikinini i no inap moa slip long hul bilong diwai. Olsem na klostu san i go daun, taragau i bringim yangpela boi i kam long ples bilong ol mama i stap long en. Ol mama i mu-muim kaukau pinis na i kam ausait na mekim kain kain stori i stap.

Nau ol i harim win bilong pisin i pairap. Ol i kirap na lukluk i stap ya taragau i bringim

yangpela boi kam klostu long meri i stap long en, ol mama i kirap nogut tru na holim pas dispela boi. Na taragau i plai i go long bus.

Nau dispela boi kamap bikpela na i maritim ol mama bilong em yet na karim planti pikinini man. Dispela lain man ol i save kolim Munjika. Ol i slip klostu long Tiria insait long W.H.P.


Taim ol dispela lain i laik singsing, ol i save pasim gras bilong taragau. Ol man i kamap patpela na naispela tru. Ol arapela lain man i save tok, ol dispela lain Mujika i kamap long taragau na i kamap gutpela.

PAINIM WOD PILAI

- Ol wod lista:
- | | | | | |
|-----------------|---------------|-----------------|-----------------|-----------------|
| ANKAIM | DAIVA | GOAPIM | HUM | LULUAI |
| BABELGAM | DES | GURIA | IMES | MALAMBUR |
| ABUSIM | BAIBAI | DROIM | JEKIM | PAURA |
| AIBIKA | BIGIN | EKSAMPEL | KANGKANG | SISELIM |
| AMBEROI | BOINIM | FANOL | HASIS | |

C	N	A	M	K	A	B	M	A	H	D	I	R	C	M	I
F	H	L	I	B	I	G	I	N	E	S	R	I	K	O	B
P	R	O	K	R	R	S	V	B	O	U	K	N	L	S	O
H	Y	N	E	C	A	G	T	I	B	R	O	P	O	A	I
N	O	A	J	I	L	E	P	M	A	S	K	E	F	A	N
D	N	F	I	D	E	G	A	E	H	I	H	T	U	X	I
F	R	A	N	N	E	L	U	S	T	S	P	L	P	E	M
D	E	I	M	Z	A	S	R	A	F	E	U	M	L	O	G
G	N	R	P	M	Z	S	A	L	O	L	M	Q	S	D	A
F	T	U	G	B	A	T	U	E	A	I	H	A	D	T	C
F	N	G	N	A	K	G	N	A	K	M	I	A	K	N	A
Z	H	O	V	I	S	Y	L	J	G	N	A	S	V	K	M
W	E	A	V	B	E	T	E	E	C	M	I	V	I	E	I
G	T	P	S	A	M	I	S	U	B	A	U	B	I	L	O
C	S	I	A	I	O	R	E	B	M	A	I	H	L	A	R
V	E	M	J	S	S	E	E	C	S	A	B	E	W	F	D

Em nau! Ol pikinini i ken painim rot i go long ples wantaim Wantok lain...



Fiseris Atoriti i tokim pipel long no ken yusim dainamat

John Papik

I gat strongpela toktok i go long ol pipel long nambis ples long Papua Niugini long i no ken yusim dainamat long painim pis.

Nesenel Fiseris Atoriti i tok dainamat i save bagarapim rip, kilim ol pis na ol arapela ol samting tu aninit long solwara, na tu i ken kilim dai pipel husat i yusim.

Fiseris opisa Mark Bangkoma i tok long 2016 sampela man long ples Tatana insait long Pot Mosbi i bin dai long taim ol i yusim



Wanpela penting long Pot Mosbi i soim piksa bilong nogut pasin bilong kilim pis long dainamat.

dispela wei bilong painim pis. Em i tok i gat lo i stap pinis long was long ol pipel i

save i yusim dispela pasin long painim pis na ol inap go long kalabus long en.

Ol refuji long Manus i winim 70 milien dola kompensesen

Caroline Tiriman

LOYA bilong ol refuji na asailum sika long Australian imigresen ditensen senta long Manus Ailan, Ben Lomai, i tok em luk olsem em bai rausim dispela keis bilong "false imprisonment" long Suprim Kot bilong Papua Niugini.

Mista Lomai i mekim dispela toktok bihain long disisen bilong Gavman bilong Australia long mekim 70 mi-

lien dola out-of-court setelmen long 731 refuji husat i stap long Manus Ailan.

Dispela disisen i bin kam aut long Victorian Suprim Kot long keis we Mista Lomai i tok em i bin givim long bikpela lo kampani, Slater & Gordon.

Immigresen minista bilong Australia i bin tokim palamen olsem dispela 70 milien dola komepensesen i gutpela long wanem em bai sevim gavman planti moa



PNG loya Ben Lomai.

mani.

Mista Lomai i tok tupela gavman bilong Australia na PNG i mas wok nau long muvim aut ol asailum sika na refuji long Manus Ailan bipo long 31 Oktoba olsem ol i tok pinis.

Ol Pasifik kantri i mas tred wantaim Esia na i no Pacer-Plus



Ol Pasifik lida i sainim Pacer-Plus long Tonga (PIF Photo)

Caroline Tiriman

OL Pasifik Ailan kantri i mas tingting long kamapim ol wok tred wantaim ol kantri long Esia na lus tingting long Pacer-Plus wokbung wantaim Australia na Nu Silan.

John Salong wanpela komyuniti lida na bisnisman bilong Vanuatu i mekim dispela toktok taim Australia, Nu Silan na nainpela Pasifik

kantri i bin sainim dispela Pacer-Plus agrimen long Tonga.

Tasol tripela kantri bilong Melanesia, Fiji, Papua Niugini na Vanuatu i no stap long dispela tred agrimen.

Ol Pasifik Ailan kantri i bin statim ol toktok wantaim Australia na Nu Silan long dispela tred agrimen long yia 2009 na las wik tasol ol i sainim na kamapim olsem

wanpela lo.

Sampela saveman long ol wok mani i wari olsem dispela agrimen bai helpim tasol Australia na Nu Silan na i no ol Pasifik kantri.

John Salong i tok moa olsem, i gutpela long ol Pasifik kantri i mekim tred agrimen wantaim ol kantri long Esia long wanem ol i gat planti pipel tru na bai ol i laikim ol prodak bilong Pasifik.

PPP i sapotim ol spesel sit bilong ol meri long palamen

Caroline Tiriman

WANPELA lida meri bilong Papua Niugini na lida bilong PNG Greens pati bipo i tok kantri i mas bihainim tingting bilong Pipels Progres Pati long putim ol sit bilong ol meri long palamen.

Dorothy Tekwie husat i Presiden bilong Wes Sepik Kaunsil ov Wimen i mekim dispela toktok long sapotim lida bilong PPP, Ben Micah long bihainim dispela tingting sapos em i winim ileksen. Ms Tekwie i tok, kantri bai ran gut na no gat planti ko-

rapsen tumas sapos planti meri i go insait long Palamen long sit bilong ol yet. Em i tok tu olsem PNG i gat pinis ol risev sit bilong ol meri long Bogenvil na tu long Sentral Provins. Nesenel ileksen bai stat long Jun 24 i go inap long 8 Julai.

Ol Manam long Madang kea senta i nidim helpim

Caroline Tiriman

WANPELA lida bilong Manam Ailan long Madang provins i askim gen provinsal na nesanel gavman long stretim ol bikpela wari bilong hangre na sik long ol kea senta long bikples Madang.

Paul Maburau i mekim dispela toktok bihain long Manam Volkeno i bin pairap

na bagarapim ol gaden kaikai na planti ol narapela samting bilong ol pipel long wanpela mun i go pinis.

Em i tok taim ol i bin kamap long ol kea senta, disasta opis bilong gavman i bin givim ol wanpela beg rais, wanpela beg flaua na wel bilong kuk, tasol ol dispela samting i pinis na nau ol i sot tru long kaikai, marasin na wara.

Em i tok tu olsem, ol pipel bilong em i laik go bek long ples bilong ol na dai long hap long wanem tupela gavman wantaim i lus tingting long ol.

Mista Maburau i tok em i laik provinsal na nesanel gavman long tingting gut long laip bilong ol Manam pipel na tu long edukesen bilong ol pikinini.

Ol Melanesia i holim graun tasol ol asples Australia i no gat

LONG dispela stori, bai yumi lukluk long olsem wanem ol pipel long planti kantri long Melanesia i papa bilong graun bilong ol yet tasol ol asples pipel bilong Australia i no gat.

Emeritus Profesa Clive Moore bilong histori dipatmen long Yunivesiti bilong Queensland - husat i save gut long histori bilong Australia na Melanesia na i bin kisim Cross of Solomon Islands awot long 2005 long olgeta wok bilong em long histori bilong Solomon Ailan i bin toktok long dispela.

Profesa Moore i tok bikpela diferens nau em olsem, long olgeta ples we Briten i bin lukautim long Pasifik, em i luksave olsem



Profesa Clive Moore na olpela Gavana Jeneral bilong Solomon Ailan, Sir Nathaniel Waena.

olgeta pipel i papa bilong graun.

Tasol long Australia, gavman bilong Briten bipo i no bin luksave olsem ol Aborijin na Tores Stret ailan pipel i papa bilong graun.

Profesa Moore i tok, long Australia na Nu Silan, ol Britis i kam sindaun - tasol long ol ailan, ol i go long ranim gavman na sampela plantesin.

Ol i painim yet 15 pipel husat i lus long solwara

Sam Seke

SOLOMON Ailan Sets na Resku Kodinesen Senta i tok olsem, sans bilong painim ol 15 pipel husat i lus yet long solwara long Marau long isten Guadalcanal, em no luk gut tumas.

Ripot i tok i 23 pipel i bin

lusim Uhu long Wes Are'are long Malaita Provins long Trinde moning, na banana bot bilong ol i bin kapsait.

Prinsipal Sets na Resku Opisa, Peter Young i tok olsem ol i bin sevim sevenpela pipel pinis, tasol wanpela pikinini i bin dai.

Em i tok narapela bot i bin

lusim Uhu long wankain taim wantaim 21 pipel insait long en i bin kamap gut long Marau.

Mista Young i tok ol i mekim wok bilong painim ol lain i lus yet tasol taim nogut i mekim na i luk olsem ol i no inap painim ol dispela pipel i stap laip yet.

Ol 79 pipel i dai long Grenfell Tower paia

OL wok painim long paia i kukim Grenfell Tower long London, Ingran i go het na ol i bilip namba bilong ol i dai bai i abrusim mak bilong 79 na i surik i go antap yet. Ol polis i tokaut olsem namba i stap long 79 nau tasol bai i surik i go moa yet na ol i ting bai ol i no inap long painim aut nem bilong sampela bilong ol dispela pipel.

Ol polis i givimaut sampela pota i soim insait bilong dispela longpela haus em paia i bin kukim las wik.

“Dispela paia i bin strong tru na i kamapim bikpela bagarap, olsem na bai ol i wok inap planti wik moa long pinisim olgeta wok. I luk olsem bai ol i no inap long painim sampela lain i lus yet bikos hat bilong paia i strong tru na i kukim olgeta samting na bodi bilong ol pipel tu.”

Praim Minista Theresa May i tokaut olsem gavman bai givim £5,500 long olgeta famili husat i no gat haus nau.

Praim Minista i bin tokaut long wiken olsem ol lain bilong givim helpim i no bin hariap long kamap na traim kilim dai dispela paia na helpim ol pipel husat i bin kisim bagarap. Em yet i bin go kamap long dispela hap na lukim dispela haus i bin paia na toktok wantaim ol pipel husat i bin ranawe nabaut long taim paia i bin kamap.

Praim minista i tokim ol pipel olsem gavman bai i mekim olgeta samting em inap long mekim long helpim olgeta pipel husat i bin stap long dispela haus.

Gavman i rausim wok bilong go pas long helpim ol pipel long dispela hevi long han bilong Kensington na Chelsea Kaunsil, na givim i go long han bilong Gold Command. Gold Command em i imejensi sevis network i save mekim wok long taim ol disasta i kamap.

Kensington na Chelsea kaunsil i karim bikpela sem

long taim ol i rausim dispela wok long han bilong en bikos em i wanpela kaunsil i gat planti mani tru tasol em i bin slek long wok long taim dispela paia i kamap.

Gavman i stat long givimaut £500 long ol famili long Sande nait na long Mande ol i putim £5,000 i go long benk akaun bilong ol. Dispela mani i kam long £5m imejensi mani gavman i bin tokaut long en na bai i go long ol famili husat i no gat haus nau. Bai ol i kisim sampela moa mani long helpim long planim bodi bilong ol lain husat i dai long dispela paia.

Praim Minista May i tok, “Long taim mipela i wok long helpim ol komyuniti, mipela i mas lukim olsem olgeta lain husat i kisim hevi long dispela bikpela birua i mas kisim rait sapot hariap.”

Long 11 klok moning long Mande, i bin gat wan minit taim bilong sarap, long tingim ol dispela pipel husat i bin dai long dispela bikpela paia.



Kensington na Chelsea Kaunsil i gat planti mani tru winim ol arapela kaunsil long kantri. Poto: Neil Hall/Reuters.

Ol polis i tokaut olsem 79 pipel i dai o ol i no painim ol o ol i bilip i dai insait long dispela bikpela paia na ol i bilip bai dispela namba i surik i go antap moa long taim ol i painim moa bodi o bun bilong ol pipel insait long dispela haus.

I bin gat planti komplek

kamap long pasin lokal kaunsil i bin mekim long taim dispela birua i kamap. Ol lain Conservative pati i go pas long dispela kaunsil. Ol pipel i tok long taim hevi i kamap, lida bilong kaunsil Nick Paget-Brown wantaim ol lain bilong em i bin paul nabaut na i no klia bai ol i

mekim wanem. Sampela lain i singaut long Nick Paget-Brown i mas risain long wok bilong em. Ol i tok gavman yet i tokaut pinis olsem ol i no hairap long helpim ol pipel olsem na nau narapela grup gen bai i mekim dispela wok bilong kaunsil.

Ol i painim ol bodi bilong ol nevi opisa bilong USS Fitzgerald



Wanpela nevi opisa i lukluk long bagarap i bin kamap long USS Fitzgerald long Yokosuka naval bes. Poto: Franck Robichon/EPA

US nevi i painim pinis bodi bilong 7-pela nevi opisa bihain long sip bilong ol USS Fitzgerald i bin bamim wanpela bikpela kontena sip bilong Filipin long solwara long Japan las wik.

Vais-admiral Joseph Aucoin, komanda bilong 7th Fleet bilong UA nevi i tokaut olsem ol i painim pinis bodi bilong ol dispela nevi opisa na ol i salim tok sori i go long famili bilong ol.

Aucoin i bin toktok wantaim ol nius ripota long beis bilong USS Fitzgerald long Yokosuka, long Japan.

Em i tok ol i mekim ol wok painim aut nau long as bilong dispela hevi na indai bilong ol dispela nevi opisa.

Em i tok amamas long gutpela wok ol opisa bilong Fitzgerald i bin mekim long taim bilong birua i bin

kamap na ol i stopim sip long go daun long solwara.

USS Fitzgerald i bin bam wantaim ACX Crystal samting olsem 100km longwe long solwara bilong japan long las wik Sarere nait.

Aucoin i tok USS Fitzgerald i bin kisim bikpela bagarap tru long sait bilong en na wara i wok long go insait long sip.

Komanda bilong sip, Bryce Benson, i laki olsem em i stap laip bikos em i bin malao i stap long rum bilong em long taim tupela sip i bin bam. Rum bilong em i bagarap olgeta na Benson i kisim bikpela bagarap na ol i karim em i go long haus sik. Ol tupela arapela opisa tu i bin kisim bagarap long dispela taim.

Narapela sip ya, ACX Crystal, em i bikpela moa long

sais bilong Fitzgerald. Em i go sua long Oi bris long Tokyo we ol opisa bilong gavman i wok long askim ol 20 Filipino wokman long dispela birua.

Presiden Donald Trump i salim tok tenk yu i go long Japan i helpim long mekim wok bilong painim ol opisa bilong sip bihain long dispela birua i bin kamap. Planti pipel long USA i bin kros long Trump i no bin hariap long tok tenkyu na salim tok sori long ol famili bilong ol lain husat i dai long dispela birua.

I gat bikpela wok painim i wok long kamap nau long dispela birua i kamap long tupela sip. Ol lain bilong Japan, USA na Filipins i mekim ol dispela wok painim aut nau.

‘Mi nidim wanpela sans tasol’: refuji winim bikpela namba

LAKI sans bilong Tuan Nguyen i kamap long taim em i bungim wanpela meri nem bilong em Misis Ramsay, husat i seklim CV bilong em na i givim em wok bilong wasim ol plet long haus kuk bilong St Vincent hospital long Sydney, Australia.

Dispela stori i bin kamap long 1982 long taim Nguyen husat i bin wanpela refuji, i ranawe long ol pasin nogut komyunis gavman i wok long mekim long ol pipel long kantri bilong em, Vietnam.

Tude, bihain long 36 yia, Nguyen i stap yet long St Vincent hospital, tasol nau em i Profesa Nguyen, na long las wik Sarere em i kisim wanpela awot ol i kolim doktaret ov saiens i kam long University of New South Wales. Ol i luksave long wok em i mekim long moa long 25 yia long risets long Garvan Institut long sik i save kamap long bun ol i kolim osteoporosis na long straksa bilong ol bun long bodi bilong man.

Dispela wik em i Refuji Wik. Na long taim Guardian Australia i toktok wantaim Nguyen, em i tok olsem em i bin laik tru long dispela namba wan wok em i kisim long wasim ol plet long haus kuk bikos nau em i stap olsem wanpela sitisen bi-

long Australia.

“Mi bin nidim wanpela sans tasol, dispela sans bilong painim wok. Dispela i helpim mi long stap na lainim pasin bilong laip bilong ol Australia.”

Long taim Nguen i kamap long St Vincent na askim long wok long haus kuk, Misis Ramsay i bin askim em sapos em i gat eksperiens long wok long haus kuk, em i giaman na tok, “Tupela yia”.

Em i kisim wok na neks de em i stat wok.

Tasol bihain long tupela wik em i pilim nogut bikos em i bin giaman na em i go tokim Misis Ramsay.

“‘Mi save’,” Misis Ramsay i bin tok, “‘Mi lukim long CV olsem yu bin stap sampela mun tasol long Australia, tasol mi laik givim sans long yu.’”

Moa long 30 yia bihain, Misis Ramsay i dai pinis tasol, Nguyen i stap yet.

Tude Nguyen em i go pas long risets bilong osteoporosis epidemiology stadi long Garvan Institute long Dubbo, Nu Saut Wels. Dispela risets em i longpela tru long wol na i helpim ol dokta long save long sik bilong bun na wanem kain ol samting i save kamapim ol dispela sik.

“Mi gat laik long stadi na wokim risets,” Nguyen i tok,

“Tasol mi laik mekim samting we inap helpim ol manmeri nating. ‘Yu mekim wanem long helpim laip bilong ol narapela manmeri?’ Oltaim mi save askim mi yet dispela kwesten bikos mi bilip em i impoten.”

Nguyen i ranawe lusim Vietnam long bot long 1981 long taim ol komyunis i wok long mekim save long ol saveman na meri. Em i bin greduet long wok ensina. Bikpela brata bilong em i bin lusim Vietnam wantaim 20 arapela pipel tasol ol i bin lus long solwara.

Em wantaim ol arapela brata na susa i lusim Vietnam long wanpela liklik bot na kamap long Thailan. Ol i kamap long prosesing senta na taim ol i askim em Nguyen i tok em i laik go long Australia bikos em i laik lukim sikau bilong Australia.

Em i kisim wok long haus kuk long St Vincen na lain Tok Inlgis na bihain em i kisim namba tu wok long nait bikos em i laik sevimi mani na go bek long skul.

Bihain long sampela yia em i go ek long yunivesiti na kisim masta digri long aplaind statistiks long Macquarie yunivesiti na bihain em i kisim PhD long marasin long Yunivesiti bilong Nu Saut Wels.

ExxonMobil amamas long wok painimaut

EXXONMOBIL PNG i amamas long wok painimaut **Independen Konsuma na Kompetisen na Komisen (ICCC)** i karimaut long wok ExxonMobil i mekim long baim baim InterOil.

Ol toktok i bin kamap bihainim wari olsem pasin

ExxonMobil i mekim bai lukim ExxonMobil tasol bai salim olgeta ges long kantri na dispela bai mekim em bai tingting long salim ges long bikpela prais na dispela bai mekim hat long ol liklik manmeri i baim ges.

Tasol ICCC bihainim wok

painim bilong em i tok dispela tingting i no tru.

Wanpela mausman bilong kampani i tok maski long dispela kain tingting, ExxonMobil PNG i wok long strongim gro bilong ikonomi long kantri na dispela ol helpim bai stap longpela

taim long kantri.

“Mipela i bilip wok bilong mipela long Papua LNG projek bai lukim operata Total i kisim sans long kain wok-bung we bai lukim taim na kost bilong mekim projek i stap daunbilu.

“Dispela bai helpim gav-

man, ol kampani i wok long projek, ol papagraun na komyuniti wantaim,” kampani mausman i tok.

“Mipela i lukluk long skruim gutpela wokbung bilong mipela wantaim gavman long kisim ted (third) pati prinsipel, wok bilong ol

divelopim lokal ges na serim wantaim olgeta stekholda na gavman mani mipela i kisim long projek.’

ExxonMobil PNG i pas long tok bilong em long kamapim ol wok we bai stap long kantri na helpim ol manmeri long longpela taim.

Ramu nikel MHP beg redi long ekspot



Poto i soim ol ol miks haidroxaid presipiteit (MHP) beg i stap redi long ekspot. Wan wan ol dispela beg em hevi bilong em wan tan o wan tausen kilogram. Poto/stori: James Kila.

DISPELA i soim ol beg miks haidroxaid presipiteit (MHP) em prodak we Ramu NiCo Menesmen (MCC i save salim i go long ovasis maket.

Long dispela yia long mun Epril Ramu NiCo Menesmen (MCC) i kamapim rekot prodaksen gen taim prodaksen i go antap tru abrusing 108.3 pesen prodaksen mak.

Dispela mak i lukim nikel prodaksen bilong dispela mun i go antap olsem 3008.11 tan long mun Epril tasol.

Insait long ripot bilong Ramu NiCo (MCC) total nikel prodaksen insait long fes foapela mun long 2017 i soim prodaksen i sanap long 10,884 tan.

Dispela em olsem 36.3 pesen mak bilong prodaksen kampani i kampim long dispela yia 2017.

Kampani i tokaut olsem gutpela wok em olgeta wok manmeri stat long Kurumbukari Main i go daun long Basamuk Rifaineri i putim wantaim i kamapim gutpela kaikai.

Dispela gutpela prodaksen mak i soim stret olsem Ramu NiCo (MCC) i go pas tru wantaim ol arapela nikel main insait long wol long sait long laterait maining.

Dispela em long sait long yusim haidrometoloji prosising na prodaksen kontrol.

BSP Wabag brens menesa, Theresa Pilamp i givim toktok long ol manmeri long Wapenamanda Haus Luteran huas sik taim benk i givim nupela samting. Poto: BSP



BENK Saut Pasifik (BSP) i skruim yet program bilong em long strongim ol komyuniti long wan wan ol projek em i kamapim.

Long dispela yia aninit long het tok “strongim ol meri na pikinini” em i lukluk moa long strongim stap bilong ol meri na ol pikinini.

Long stat bilong dispela mun ol wok manmeri bilong BSP long Wabag, Enga i mekim nupela londri na ples bilong wet long ol mama na pikinini long wod bilong Immanuel Luteran Haus sik long Wapenamanda.

Long mekim dispela ol wok manmeri i voluntia long wiken long klinim dispela hap na larim ol kontrakta i miksim simen, kapsaitim na bihain penim dispela hap.

Ol wok manmeri i amamas long givim nupela televisen long dispela wod.

Wabag Brens Menesa, Theresa Pilamp i makim benk na givim dispela ol nupela samting long haus sik.

“Mipela i amamas olsem wok bilong mipela bai go longwe long helpim komyuniti long stap bilong ol meri na pikinini long haus sik,” em i tok.

“Olsem ol i stap na wok gut.” “Ol manmeri husat i was long ol i no ken wari tumas long go ausait long ol wok bilong wasim klos bilong ol.

“I gat ples bilong we na mipela bai putim nupela klos lain long ol i ken hangamapim ol klos.

“Mipela i save olsem sampela taim em i save hat long long stap long haus sik.

“Ol meri wantaim famili bilong ol i save wokabaut long longwe hap long kisim marasin.

“Long dispela as mipela i

bilip kamapim kain liklik samting i ken helpim ol sikmeri na pikinini long ol i ken stap gut, kisim marasin na kamap orait hariap.”

Mis Milamp i tok komyuniti projek bilong ol i lukluk long mekim ol samting we dispela ol samting i mass tap long taim long ol komyuniti i ken givim gutpela sevis long ol.

Em i tok ol i amamas long givim dispela nupela ples bilong wasim klos na ples bilong wet i go long haus sik.

Long wankain taim brens long Pot Mosbi i lukim ol i givim ol samting bilong kuk na nupela haus win i go long Moale Foa Skwea Sios long Kaugere.

Moale Ofenes (orphanage) i nupela senta sios i ranim i save lukim ol pikinini husat i gat 10-pela krismas i go daun na papamama bi-

long ol i dai pinis.

Dispela senta i helpim ol pikinini long lukautim ol na bilong givim kaikai na ples bilong slip tu.

Long wankain taim BSP tim long Popondetta, Noten provins i stretim wanpela nupela klasrum na nupela wara tenk long Popondetta Elementeri Skul.

Stat long 2009 na i kamap inap long nau benk i kamapim na givim olsem 287 nupela projek long ol komyuniti.

Long dispela yia benk i plen long givim 48 komyuniti projek we em bai mekim long mani mak bilong K1.2 milien.

Dispela em bai kamapim aninit long Brens na Strategic Bisnis Yunit (SBU).

Inap long nau em i kamapim pinis olsem 4-pela projek bilong 8-pela projek em i plen.

Eksens reit mas kamdaun, saveman tok

WANPELA tisa long Yuni- vesiti bilong Papua Niugini, Rohan Fox i tok eksens reit bilong kantri i mas kamdaun.

Em i tok maski Apec (Esia Pasifik Ikonmik Koperesen) kibung long 2018, dispela bai i no inap long daunim hevi bilong mani kantri nau i wok long bungim.

Em i tok nau olsem ekse- nis reit bilong Kina i sindaun gut, olsem em i no moa go daun, i gutpela lukim sapot Kina i go antap na mani bi-

long narapela kantri i kam insait isi olsem long Dola bilong Amerika na Australia.

Fox i save em bai hat long apim Kina i go antap tasol sapos inap, dispela bai kirapim bel bilong planti save- man long rot em em i no inap long mekim.

“Olsem mipela i tokaut long dispela yia long ileksen bilong 100 sif eksekutiv opisa, (CEOs) wok bilong ol kampani i kisim mani bilong narapela kantri i kam insait i hat,” em i tok.

“Long em i go daun o i go antap, dispela i stap long han bilong husat i kamapim gavman bihain long ileksen.”

Fox i tok i luk olsem nupela gavman bai laikim helpim bilong ol ovasis kantri, na bai laik lukluk long eksens reit we i stap isi na dispela i ken lukim Kina i kam daun tu.

Em i tok sapos wankain gavman i kam bek, mipela bai lukim wankain lo na polisi i stap yet we nogat planti eksens reit bai stap

na we eksens reit bai stap yet olsem em yet i stap long em bipo.

“Mi ting olsem hevi bilong mani i sot long foren eksens i kampaim bikos ol lo bilong mekim isi foren eksens i hat na strong.

“Sapos yu skelim yu inap long daunim lo bilong ekse- nis reit, dispela bai kamapim moa hevi long gavman na ol bisnis haus na dispela bai lukim kost bilong ol guds na sevis i go antap.

“Dispela i min gavman i

mas skelim wanem samting i bikpela na wanem samting i liklik taim em i mekim ol bikpela disisen.

Long sait bilong strongim ikonomi na long daunim foren eksens hevi, Fox i bilip divaluetim Kina bai stretim ol hevi PNG i wok long bungim.

Long sait bilong Kina i stap strong yet em i tok long K1 bilong dispela i bai wankain olsem 30 siling (toea) bilong Amerika dola. (Strong bilong PNG Kina i no moa wankain

olsem Amerika dola long ol yia olsem long 1980s we em i bin kam daun.)

Em i tok risos sekta bilong PNG i develop bikpela na planti kantri i wok long mangal na aigris long kain polisi kantri i gat long lukim ol kampani i helpim tu long mekim ol skul, haus sik, rot, bris na haus bilong ol gavman opisa long slip.

“Mi laikim kain sapot long bisnis komyuniti i mas stap oltaim bai lukim kantri i kamap gut.

CPL holim bek bisnis wok long POM Sox

Benorah C Hesehing

CITY PHARMACY LIMITED (CPL) i holim bek se bilong kampani long Pot Mosbi Stok maket (POM Sox) na ril riwod kad sevis bilong kampani inap liklik taim bihain. CPL i holim bek POM Sox sea, long givim taim long

kampani kamap orait gen long dispela paia i bin bagarapim hetkwata bilong ol long Pot Mosbi, long wiken.

Ril Riwod kad sevis i pas long liklik taim tu, bikos ol i statim gen memori bilong bikpela kompyuta bilong kamapani, we i save wok

long dispela sevis.

Wok painim aut i wok long gohet yet long painim wanem as tru dispela paia i kirap.

Wokmeri bilong CPL Maketing Dipatmen, Mandy Copeland, i tokim Wantok Niuspepa olsem, kamapani i no laik sutim tok

nating long wanem as paia i kirap.

Ol i wet yet long wok painim aut bilong Papua Niugini Paia Sevis, i pinis gut.

Menesing Dairekta bilong CPL, Joe Barberis, i tok olsem, kampani i holim bek treid long POM Sox, long abrusim ol giaman tok na

painim aut gut long dispela bagarap ol i bungim.

Em i tok, kamapani i lukluk long kam bek long wankain wei bilong wok bisnis bihain long tupela wik.

Taim olgeta samting i orait, bai ol i toksave long ol man i gat sea wantaim CPL long POM Sox.

Siaman bilong CPL, Mahesh Patel, i tok paia i bagarapim olgeta samting bilong kampani, tasol impoten samting em olsem, ol wokman i no kisim bagarap.

CPL i tok klia olsem, olgeta stua bilong ol bai wok wankain long givim sevis long ol pipel.

Kaunsil laik promotim PNG

PAPUA Niugini Bisnis Kaunsil i plen long promotim PNG olsem ples bilong mekim bisnis taim ol i holim konperens bilong ol long Sidni, Australia long Septemba dispela yia.

Wanpela opisa bilong kaunsil, Andrew Wilkins i tok wok bilong ol em long tokaut na soim ol investa long narapela kantri olsem PNG i gutpela ples bilong ol long stap na kamapim wok bilong ol.

“Planti manmeri harim tasol na tok PNG i nogut tasol ol yet i no kam, stap na lukim bai ol i save kantri i stap olsem wanem,” Craig Lennon, Hailans Pasifik sef eksekutiv opisa i tok.

Hailans Pasifik i gat sea long Ramu Nikel, Madang na Frieda Riva Kopa projek, Wes Sepik provins.

Em i tok planti ol bisnis we i tingting long mekim bisnis long PNG i painim olsem

taim ol i save long kantri, ol i no save lusim taim long statim bisnis bilong ol.

Long Kina Benk i listim em long Australia Sekyuritis Ekseknis long 2015, salens bilong sef eksekutiv opisa Syd Yates em long tokim ol investa olsem Kina i gutpela bisnis na PNG i gutpela ples long inves.

Listing bilong Kina i kamap gut tasol long promotim na salim PNG, dispela i bin hat.

“Mipela i lukim inap olsem 300 kampani long Australia na i no gat wanpela i traim long bekim toktok bilong mipela,” Mahesh Patel, siaman bilong CPL Grup i tok.

Em i tok salens ol i kamapim, na ol tingting ol i gat taim ol i statim bisnis na invesmen gaid long 2006.

Bihainim dispela em i tok ol i kamapim pinis 5-pela invesmen samit (kibung), 12-pela enuel edisen bilong

Bisnis Edventes PNG na nau yet i gat 430,000 rida long wol we i save long websait bilong ol.

Wilkins i tok long 7 i go long 8 ol bai kisim promosen bilong ol long PNG i go moa yet.

Em i tok Craig Lennon, Syd Yates na Mahesh Patel bai joinim ol olsem sampela bilong ol bisnis man husat bai givim toktok.

Ol narapela man husat bai givim tok em Peter Boten bilong Oil Search, Kumul Petroleum Wapu Sonk na SP Brewery Stan Joyce na Loi Bakani bilong Benk bilong Papua Niugini.

Ol bai askim Dr Stephen Nash, sef investment opisa biong PNG supa fan, Pasifik Balen Fan long we kantri bai go long narapela 10-pela yia.

Em i tok ol hop long mekim isi bai ol investa i mask am isi long kantri.

BSP inap bungim hevi, saveman tok

BENK Saut Pasifik (BSP, bikpela benk long kantri long taim i holim enuel jeneral kibung bilong em, em i tok maski ol taim i bin strong, we wok strong tasol i bilip em bai bungim sampela hevi long yia i kam.

OL saveman i tok Benk Saut Pasifik i wok long mekim gut, em bai bungim hevi yet sampela taim.

Dispela long wanem ol i tok kantri i bungim hevi bilong mani tu.

Ol i mekim dispela tok long benk i redi long holim enual kibung bilong em.

Long enuel kibung (AGM) wantaim ol seaholda, benk i tokaut olsem long 2016 benk i mekim K643 milien winmani, dispela em olsem 21 pesen gutpela mak.

Long hama mani em i kisim long 2016, benk i tok em i mekim olsem 16 pesen, dispela em K1.79 bilien. Total kost i go antap long 11.4 pesen. Long Papua Niugini, benk i gat olsem 55 pesen maket sea long dinau na 57 pesen maket sea long deposit.

Mani em i kisim long was sapos hevi bai kamap i go

antap tupela mak gen wantaim 11.4 pesen. Long PNG, benk i gat 55 pesen sea maket long dinau na 57 pesen maket sea deposit.

Long mani em i kisim long was sapos hevi nogut i kamap 23.1 pesen. Dispela mak i go antap, dispela i dabolim mak

Riten long ekuiti em wankain long ol wol standet. Dispela i go antap long 1.8 pesen i go long 29.6 presen.

Long sait bilong benk we moa manmeri i save go long em, BSP i tok em i benk we planti manmeri i save mekim wok wantaim.

Long Oliver Ryan na Junior Gotaha, ol saveman (analisis) bilong Pacwealth, tupela i amamas long mak benk i mekim long 2016.

“BSP i stap benk we em i gat planti kastoma long em, i gat planti aset na i save mekim gutpela winmani na i benk we isi long winim ol aset.”

“Wan handet (100) na foa toea i ken tanim na kamapim 10 pesen.

“Dispela em gutpela mak na mipela i amamas.”

Dispela em i gutpela mak

taim wanpela i skelim ol sea bilong BSP i gro 25 pesen long las 12-pela mun.

“Makim dispela wantaim long Benk bilong PNG long 364-de GTresari Bil, dispela i gro olsem 7.8 pesen.”

Oliver na Gotaha i tok 66.4 pesen total dinau bilong benk i stap insait long kantri yet na dispela inap kamapim hevi.

“Olsem ol i soim long S&P Epril reting rivi, soim bilong BSP long komasel na koporet dinau mani ken givim hevi, dispela hevi i stap long mak bilong 17.2 pesen long 2016, em K10.1 bilien.

“I bin gat narapela K320 milien long namba wan kwata long 2017 na 3 pesen gro long kwata pastaim.”

“Long ol manmeri i bekim dinau hariap bikos long hevi bilong ileksen, bikos long hevi bilong mani long kantri na long kes mani insait long kantri, dispela em ol mak we i ken kamapim hevi long benk,” tupela i tok.

Tasol tupela i tok maski long dispela ol hevi, benk bai go het long kisim wantaim ol kastoma long strongim em.

Were: 10-yia plen long stretim Hailans Haiwe

PLEN bilong stretim 430-kilomita Hailans Haiwe bai stat sampela taim bihain long dispela yia, Woks Sekretari David Were i tok.

Dispela bai kamap bihainim 10-yia ripea na mentenens plen we Asia Development Bank (ADB) i givim mani long em.

Mani mak bilong stretim dispela haiwe i stap long K3.2 bilien (US\$1 bilien).

Em i tok as tingting bilong stretim haiwe em long lukim rot i stap strong long sampela yia pastaim.

Em i tok em i amamas long mani bilong em bai stap sampela taim.

Mani bai kam aininit long Sastenibel Hailans Haiwe Invesmen Program bilong benk.

Wantaim Hailans Haiwe, Were i lukluk long stretim narapela 16-pela prairiti rot long kantri tu.

“Long olgeta rot mipela i gat long kantri, Hailans Haiwe i wanpela bikpela rot mipela i gat long em,” em i tok.

“Em i save givim sevis long

tri kwata populesen bilong kantri. Planti bilong ol bikpela maining na petroleum projek i stap long dispela (Hailans) rijon.

“Dispela rot stat long bikpela bris long Lae i go antap long Hailans na we ol projek i stap long em i bikpela ikonmik rot bilong kantri.”

Haiwe em 700 kilomita longpela na stat long Lae bris, bihainim Markham Veli, go antap long 1500 mita Kassam Pass na bihain go long Goroka long lsten Hailans provins.

Bihain long dispela em i go long 2478 mita Daulo Pass i go long Kundiawa, Shimbu provins, Minj long Jiwaka na bihain go long Mt Hagen long Westen Provins.

Bihain long dispela rot i bruk wanpela i go long Wabag na Porgera long Enga provins na narapela i go long Mendi, Kutubu long Sauten Hailans na bihain go long Tari na Hides ges long Hela provins.

Nau yet, Haiwe i bagarap we i pulap long ol pot hol na graun bruk na mekim i hat long ol kar i kisim ol kago i go kam.

Were i tok moa long K1 bilien go long 90 kilomita hap bilong rot we i bagarap tru olsem long hap bilong lsten Hailans na Simbu na go long boda bilong Jiwaka.

“Dispela ol hap mipela i laikim sampela gutpela ensinia wok i mas kamap long ol,” em i tok.

“Mipela i gat toksave long nupela kain ol disain na husat enjinia kontrekta i mas wok gut long dispela hap.

“Stat long pinis bilong dispela yia, mipela i mas save long wane mol kontrekta bai wok long dispela ol hap wantaim gutpela standet.

Were i tok ol i lukluk long kisim 10-pela yia long stretim Haiwe.

Long ol 16 arapela rot long kantri, em i tok ol i lukluk long Wol Benk long helpim long givim dinau mani.



Ol wokman i stretim sampela hap bilong Hailans Haiwe. Foto: Internet

Nesenel Weta Sevis tok lukaut

James G. Kila i raitim

PAPUA Niugini Nesenel Weda Sevis (PNGNWS) i salim bikpela tok lukaut i go long ol manmeri long ol ples klostu long nambis na ailan long sauten na noten rijon bilong PNG, long strongpela win nau i wok long kamap na ol mas no ken go aut na stap longpela taim long solwara.

Dispela weda o toksave long strong bilong win na solwara em PNGNSW i

bin go aut long las wik Sande yet na em i go het yet long toksave long ol pipel long was gut long ol yet long taim bilong strongpela win.

Dispela toksave em i karamapim ol ples stat long Daru na Kerema, i go olsem long Milen Be provins na ol ailan bilong en, na tu ol Noten eria karamapim Finshafen na Siassi long Morobe provins na i go olsem long Bogia long Madang provins na long Wes Nu Briten.

PNG Nesenel Weda Sevis i tokaut olsem dispela strongpela win i stat long 25 igo 34 nots, na i gave ron go het inap 24 aua. Dispela win i save kamapim bikpela tait long solwara na solwara i solap.

PNG Nesenel Weda Sevis Asisten Dairekta, Jimmy Gomoga i tok salim toksave i go long olgeta lain manmeri long ol nambis na ailan ples long noten na sauten rijon long harim tok na bihain.

Gomoga i tok ol man-

meri long ol nambis na ailan ples mas noken go aut long painim pis o ran long dingi karim ol pipel na muv i go long narapela hap long dispela taim.

Madang provins Asisten Disasta kodinta, Rudolf Mongalee i mekim bikpela toksave tu i go long olgeta lain papa bilong ol dingi we save mekim transpot bisnis namel long Madang na Raikos long luksave long dispela bikpela toksave i kam long PNGNWS.



Dispela pasindia banana bot bilong Raikos i nogat petrol na trip na kampani sip bilong maining kampani Ramu NiCo (MCC) i bin sevim ol. Poto: James G. Kila

Nipa-Munihu Rot Impruvmen Projek i redi



Gavana Jeneral, Dob Dadae asde i makim stet long lukiim kontrak fanding na mentenens bilong Nipa-Munihu Rot long Sauten Hailans Provins.

Projek kost i stap long mani mak bilong K91, 938, 922 na mani bai kam long Esien Developmen Benk aninit long ADB Lons na Grents bilong Yuropien Yunien bilong Hailans Rijonal Rot Impruvmen Invesmen Program.

Rot wok bai stat long rot bung bilong Hailans Haiwe 50 kilomita ausait long Mendi stesin na bai pinis long rot bung bilong Mendi-Kandep rot long Munihu distrik. Dispela apgret na silim

bilong Nipa-Munihu rot bai karamapim 28 kilimita rot.

Ol i givim kontrak i go long China Overseas Engineering Group Co. Ltd. Ol mausman bilong kampani, Ding Shi na Feng Wei i sainim kontrak we Seketeri bilong Dipatmen bilong Woks, David Werek i witnessim long gava-man haus asde moning.

Long taim bilong givim tok orait bilong kontrak, Nesenel Eksekutiv Kaunsil i bin givim tok oda long 50 pesen o hap mak bilong lokal kontrak i mas stap insait long dispela kontrak.

Projek bai stat klostu taim na bai kisim 24 mun long pinisim olgeta wok bilong en.

Mista Ding Shi Feng Wei bilong China Overseas Engineering Group Co. Ltd i sek han long Gavana Jeneral Bob Dadae bihain long ol i sainim kontrak. Poto: Gavman Haus.

Edukesin tasol bai senesim kantri - Andandi

Mathew Yakai raitim MY Media & News Agency

OLGETA risos long graun, bus na solwara bai pinis tasol human risos bai stap yet na karim kantri i go het sapos olgeta sekta na lida man wantaim gavman i putim mani long edukesen bilong ol pikinini tude.

Kendidet bilong Tambul-Nebilya Open Sit, Gabriel Andandi i tok ol neserel risos olsem oil, gas, gold, copper, nickel/cobalt na ol narapela risos bai pinis wanpela de tasol human risos baistap yet sapos man i kisim gutpela na bikpela save long menesim kantri i kamap bikpela long 21stsen-suri na bihain taim.

Mista Andandi i tok tu olsem wok egrikalsa i gut-

pela bilong ekonomi bilong kantri tasol sapos i gat ol bikpela save man na saintis bilong wok egrikalsa tu bai i kirapim wok i go bikpela na strongim fud sekyuriti.

"Mi bin peim skul fi bilong moa long 3,000 sumatin bilong Tambul-Nebilya husat i skul long ol bikpla koles na yunivesiti stat long yia1997 i kam inap tude. Dispela yia mi peim moa long hap million Kina bilong moa long 1,500 sumatin wantaim as tingting long kamapim moa save man insait long ilektoret na kantri,"

"Dispela ol PNG sumatin wanpela taim bai ol i gat bikpela save long kirapim PNG i go insait long planti salens kamap insait long wol. PNG tude i nidim kain lida husat i gat bikpela save

na i yusim wisdom long menesim ran bilong kantri tude," Mista Andandi i toktok.

Dispela em ol kain het toktok we Gabriel Andandi i bin tokim ol pipel bilong Tambul-Nebilya long las 7-pela wik i go pinis long kempen taim na tok strong olsem olgeta pikinini i gat rait long gutpela edukesen o wei bilong kisim save.

"Taim mipela peim skul fi bilong ol sumatin na tokim ol long skul gut, mi gat kliat tingting olsem dispela em ol human risos bilong PNG we yumi bai nidim na i no inap tok yesa tasol long ol waitman na meri long wok konsalten na bisnis insait long kantri we planti wok em yumi yet ken wokim,"

"Ananit long skul fi initise-

tiv bilong mi, mi gat bikpela driman olsem sapos mi ken kisim kain save long taim we mi bin skul taim laip i hat stret, tude em ol sumatin i gat sans long kisim bikpela save bikos teknoloji i go bikpela olsem mobail fon, intanet, redio, TV na ol narapela samting we ol i ken kisim ol gutpela infomesin long kamapim save bilong ol i go bikpela," Mista Andandi i toktok.

Mista Andandi i tok kempen polisi bilong em i long kamapim ol bikpela save manmeri insait long Tambul-Nebilya long kamap pilot, tisa, dokta, loya, nes na ol narapela ol bikpela save man na meri.

Moa long 3,000 Tambul-Nebilya sumatin long PNG na ovasis i endosim Gabriel

Andandi na peim nominesin fi long kontestim Tambul-Nebilya Open Sit 2017 wantaim bikpela as tingting na

diriman long kamapim moa save manmeri insait long Tambul-Nebilya, WHP na PNG.

Gabriel Andandi wantaim RO bilong Tambul-Nebilya, Philip Kansol. Poto: Mathew Yakai.



2017 NRL Dro bilong raun namba 16

Det	Hom	Awe	Pilai Graun	TV	Taim
Fraide, Jun 23			Mt Smart Stediam	Fox	6:00 pm
Fraide, Jun 23			Campbelltown Stediam	Nine, Fox	7:50 pm
Sarere, Jun 24			1300Smiles Stediam	Fox	3:00 pm
Sarere, Jun 24			GIO Stediam	Fox	5:30 pm
Sarere, Jun 24			Adelaide Oval	Fox	7:30 pm
Sande, Jun 25			UOW Jubilee Oval	Fox	2:00 pm
Sande, Jun 25			Southern Cross Group Stediam	Nine, Fox	4:00 pm

Ol tim bai stap sambai em: Eals, Rabbitohs.

2017 NRL Risal bilong raun namba 15

Det	Hom	Awe	Pilai Graun	TV	Taim
Fraide, Me 16	32 (win)	20 (lus)	ANZ Stediam	Nine, Fox	7:50 pm
Sarere, Me 17	23 (win)	22 (lus)	AAMI Park	Fox	5:30 pm
Sarere, Me 17	24 (win)	22 (lus)	Southern Cross Group Stadium	Fox	7:30 pm
Sande, Me 18	24 (win)	10 (lus)	ANZ Stediam	Nine, Fox	4:00 pm

Ol tim i stap sambai em:

Broncos, Bulldogs, Knights, Panthers, Raiders, Roosters, Sea Eagles, Warriors

2017 NRL Lata | TELSTRA PREMIASIP

Posisen	Tim	P	W	L	D	B	F	A	+/-	Pts
1		14	12	2	0	1	319	212	107	26
2		14	10	4	0	1	310	228	82	22
3		14	10	4	0	1	264	194	70	22
4		13	9	5	0	1	301	225	76	20
5		14	8	5	0	2	299	237	62	20
6		14	8	6	0	1	297	235	62	18
7		13	8	6	0	1	287	259	28	18
8		13	6	7	0	2	284	253	31	16
9		15	8	7	0	0	282	318	-36	16
10		14	6	8	0	1	316	270	46	14
11		14	6	8	0	1	274	303	-29	14
12		14	6	8	0	1	194	247	-53	14
13		14	5	9	0	1	258	313	-55	12
14		14	4	10	0	1	298	382	-84	10
15		13	2	11	0	2	210	351	-141	8
16		14	3	11	0	1	204	370	-166	8



Martin i joinim ol Cowboys

NORTH Queensland Cowboys i sainim nem bilong bipo habbek bilong Penrith Panthers, Te Maire Martin, aninit long klap bilong ol. Kontrak bilong Martin bai

pinis long pinis bilong 2019 sisen. Martin i gat 21 krismas na i stat trening wantaim nupela klap bilong em long dispela wik bihain long ol Panthers i lusim em.

Bipo pilai bilong ol Panther, Te Maire Martin, i joinim ol North Queensland Cowboys. NRL Poto.

Fittler i Het Kosa bilong Lebanon

LEBANON Ragbi Futbal Fed-eresen (LRLF) i amamas long tokaut long ol i makim Brad Fittler olsem nupela het kosa bilong Lebanon nesenel tim.

Bipo kepten bilong Australia Kangaroo na tupela taim wol kap wina bai go pas long ol Cedars long Ragbi Lig Wol Kap resis bilong dipela yia.

Fittler bai stat na wok strong long ol operesen bilong nesenel tim klostu taim.

Fittler i gat bikpela ek-

spirians long kamap kosa o skulim ol ragbi lig tim long NRL level. Em i bin kamap kosa bilong City Origin na wantaim ol Sydney Roosters long yia 2007 i go inap 2009.

Bipo top pilai bilong NSW Blues i tok olsem em i lukluk long sans bilong helpim ol long kamapim strongpela ragbi lig long Lebanon na tu long yusim save bilong em long lukautim ol Cedars long rot bilong ol i go long 2017 Wol Kap.

"Sans bilong lukautim

wanpela developng kantri long Ragbi Lig Wol Kap resis bilong dispela yia em i wanpela wok mi amams long mekim," Fittler i tok.

"Mi lukluk long go long Lebanon bilong givim ol skul toktok long helpim ol long developim lokal sempionsip bilong ol gut."

CEO bilong LRLF, Remond Safi, i welkamim makim bilong Fittler olsem em i wanpela nambawan risal Wol Kap kempeng bilong Cedars na ol i go het long mekim gut

long Lebanon.

"Ol i makim Brad i luk olsem LRLF bai go het na mekim gut long top level bilong ragbi lig na ol i strong inap long resis long Wol Kap aninit long top kosa," Safi i tok.

Lebanon i stap long Pul A bilong Ragbi Lig Wol Kap resis na em bai pilai egensim Australia, Ingran na Frens. Ol top 3 tim bilong dispela grup bai kwalifai o go insait long kwata fainal salens.

Errol Christie: Top boksa i pasim ai

SEMPION boksa, Errol Christie, i dai bihain long em i pait egensim lang kensa.

Derby, husat i ankol bilong Errol, na futbal pilai Cyrus Christie i bin tokaut long dai

bilong bipo midol weit taitel wina bilong Yurop long las wik Sande.

Christie i gat 54 krismas na em i wanpela Briton long winim 10-pela ametja taitel.

Em i bin kamap kepten bilong Ingran long ametja boksen namel long 1980 i go inap 1983.

Long 1982, ol i bin stap top ples long anda 19 Yurop

ametja senmpion long East Berlin. Ol i tok, dispela em i namba wan win bilong wanpela British emetja long dispela taim.

RLWC2017 i tokaut long ragbi lig pilai graun

RAGBI Lig Wol Kap 2017 (RLWC2017) wantaim Christchurch Siti Kaunsil (CCC) i amamas long tokaut long ol i bin kamapim tupela ragbi lig graun long Christchurch olsem ligesi bilong tonamen i go long lokal komyunit.

Tupela pilai graun em long Leslie Parkna Wainoni Park, hom graun o asples bilong Hornby Panthers na Aranui Eagles klap.

Ol i kamapim dispela tupela pilai graun bihain long Christchurch i redi long go pas long tupela gem long taim bilong RLWC2017.

Tupela hap wantaim i redi na ol baqi yusim olsem trening hap bilong ol intenesenel tim bai go stap long Christchurch long taim bilong tonamen.

Dispela ligesi program em i namba wan na bikpela samt-

ing long ol lokal komyuniti bikos ol bai yusim tupela nupela pilai graun bihain long pinis bilong tonamen.

Kosa bilong Nu Silan Kiwis, David Kidwell, i bin pilai junia ragbi lig wantaim Hornby Panthers, na i amams na welkamim dispela toksave.

"Mi bin satatim Ragbi Lig pilai bilong mi long Hornby na mi save amamas long go bek gen long Leslie Park lukim ol save fes long hap," he said.

"Em i bikpela samtng long ol pipel long olupela klap bilong mi na ol lain long Aranui bilong ol bai amamas na pilai long nupela pilai graun long ol yia i kam."

"Mi amams long go bek long taun bilong mi wantaim ol Kiwis long taim bilong Ragbi Lig Wol Kap resis," Kidwell i tok.



Christchurch Siti Kaunsil Deputi Meya, Andrew Turner, wantaim Nu Silan ragbi lig heta kosa, David Kidwell, i bin stap long Hornby Ragbi Lig Klap.

GLASIM RAMU NICO PROJEK MCC
"Wanpela Ramu Nico, Wanpela Komuniti"

Nupela paia trak na nupela ERT wokman long strongim BSK ERT



Ramu NiCo Basamuk Rifaineri Suprintenden, Venancius Sapak i sanap stail arere long nupela paia trak.



Nupela paia trak i stap sambai arere long HPAL.



OI Basamuk ERT wokman i mekim dril o trening long trening eria bilong ol.



Wanpela dril long dispela yia long Basamuk Rifaineri.

IMEJENSI rispons o wok bilong banisim birua o stopim birua long kamap long Basamuk Rifaineri i kisim gutpela luksave i kam long Ramu NiCo Menesmen (MCC).

Dispela luksave i kam taim ERT seksen long Basamuk Rifaineri i bin kisim wanpela nupela paia trak we bai helpim gut stret wok bilong ol. Dispela nupela paia trak em i gat planti nupela samting long sait long teknoloji

insait long en na Ramu NiCo (MCC) i bringim i kam stret long Saina.

Kampani i luksave tu long ERT long Ramu NiCo Kurumbukari Main long kisim wanpela nupela paia trak bilong ol tu long helpim wok bilong ol.

ERT Suprintenden long Basamuk Rifaineri, Venancius Sapak i tok olsem dispela nupela paia trak em klostu taim bai ol i komisanim o lonsim na dis-

pela trak bai helpim stret tim bilong en long kain ples olsem Basamuk Rifaineri we i gat planti ol bikpela masin na ikwipmen i stap long en.

Mista Sapak i tok olsem dispela nupela paia trak em i gat 10-pela wil na i gat spes long karim 10,000 lita wara na 5000 lita fom marasin long kilim indai paia taim paia i kamap.

"Insait long PNG na ol kampani we mi wok wantaim ol pastaim em ol no gat

kain bikpela paia trak olsem.

"Ating dispela paia trak we i gat inap tenk olsem 10,000 lita bilong wara na 5000 lida bilong fom marasin em bikpela samting stret," Mista Sapak i tok.

ERT Suprintenden, Mista Sapak i tokaut tu olsem ERT long Basamuk Rifaineri i kisim tu wanpela nupela ERT treina na wanpela nupela ERT supavaisa. Dispela tupela wokman bai strongim tim long daunim ol hevi na


tu stap strong long banisim birua sapos wanpela samting nogut i kamap long rifaineri olsem paia o arapela hevi.

Nupela treina em Gabriel Nalek, husat i bin wok pastaim long Newcrest Lihir, na narapela nupela supavaisa em Gerard Ila Renagi, husat pastaim i wok wantaim Puma Energy long Napa Napa Rifaineri long Mosbi.

Mista Sapak i tokaut olsem dispela nupela treina

wantaim supavaisa bai helpim tru Basamuk ERT tim long stap sambai long banisim na stopim wanem kain ol birua olsem paia na ol arapela hevi i kamap.

Em i tokaut tu olsem ol dispela nupela treina wantaim supavaisa bai helpim tu foapela nupela treini husat i joinim ER tim long Basamuk. OI dispela treini em Ismael Bill, Jensen Genaia, Junior Tambi na Emmanuel Gigmai.



Pot Mosbi Rot Rana

Risal bilong las wik Sarere

2.4 KM: 1 Petro Daniel 12.37, 2 Georgina Unido 12.55, 3 Ojay Unido 12.58, 4 Tau John Tokwepota 21.01 na 5 Xavier Kavan 22.26.

6.0 KM: 1 Kelo Kaia 27.19, 2 Buda Awowari 31.40, 3 Justin Akisu 42.12, 4 Jack Rino 42.59, 5 Augustine Unido 49.00, 6 Ten Siong 49.20, 7 Graeme O'Flaherty 55.15, 8 Simon Nutley 55.20, 9 Vincent Ong 56.43 na 10 Alithia Barampataz 58.17

8.4 KM: 1 Seken Kiage 35.50, 2 Swans Pinampio 39.26, 3 Phil Cowling 41.45, 4 Charlie Parker 45.06, 5 Ben Chege 47.27, 6 Peter Motanya 49.23, 7 Roy Trivedy 50.12, 8 Henry Horou 59.45, 9 Mirzo Isoev 63.31 na 10 Robin Yara 63.41

Titus Tobia i taim kipa

POT Mosbi Rot Rana (POMRR) i stat long raning resis long ol strit bilong kapital bilong Papua Niugini, Pot Mosbi, insait long 38 yia. Ol i laikim pablik long joinim dispela grup long wokabaut, ran o sprin.

Dispela i bilong pesenel trening long go resis long Komonwelt Gems bai kamap long Gold Coast o bilong kisim gutpela win na wokabaut wantaim ol poroman.

Resis long wei na mak bilong yu.

Ol resis i save stat long 5.00 kilok apinun. Fi bilong go insait long resis em 20 toea.

Resis long dispela Sarere, 24 Jun, 2017 em ol bai stat long Tokara; ol rana bai bung long CRC Siosna Nesenel Hausing Kopresen

Ela Nambis bai gat moa ples bilong voli na basketbal

Philemon Tame i raitim

WANTAIM nupela wok i kamap long Ela nambis eria long Pot Mosbi, bai skruim namba bilong ol volibal na basketbal pilai graun i go antap long 6-pela olgeta.

Gavana bilong Nesenel Kapital Distrik, Powes Parkop, i tokaut long vidio bilong wok i kamap long Ela nambis olsem, Nesenel Kapital Distrik Komisin (NCDC) i go pas long kamapim ol nupela fesiliti we ol manmeri, pikinini na famili i ken go yusim.

Dispela em i K55 milien projek na bai pinis long mun Mas bilong yia i kam.

"I no gat wanpela lain bai kamap papa long ol dispela fesiliti, nogat," Gavana Parkop i tok.

"Ol fesiliti bai op long olgeta taim. I no gat wanpela tok tambu bai stap."

Parkop i tok moa olsem,

ol bai skruim sais bilong nambis i go moa bikpela long sais i stap nau.

"Sais bilong nambis bipo em i 15,010 skwea mita na nau ol bai kamapim tripela nupela nambis bai gat spes mak long 21, 250 skwea mita.

"Ol fesiliti bilong pilai na amamas long taim bilong wiken na ol fri taim bilong ol pablik bai surik long 36, 580 i go antap long 54, 715 skwea mita.

"Bipo, nambis i gat 160 hap long putim kar, tasol nau bai surik i go antap long 365 spes bilong putim kar.

"I gat plen i stap tu long putim wanpela profesenel kampani long lukautim na stretim ol fesiliti taim ol i bagarap. Na plen i stap tu bilong redim skyuriti bilong ol pipel.

"Mipela bai makim sampela ol woklain tu long kamap klina bilong larim



NCD Gavona, Powes Parkop.

nupela eria i stap kiln.

"Ol bai no inap baim sampela fi. Ol pilai graun, hap bilong putim kar na ol toilet em fri long ol pablik i ken yusim," Gavana Parkop i tok.

Tasol, Gavana Parkop i tok strong long ol pipel long yusim ol dispela nupela fesiliti gut bihain long ol i pinisim wok.

Em i tok moa olsem, dispela projek i no kamap aninit long APEC o bilong ol lain bilong narapela kantri long yusim, nogat. "Em i bilong ol pipel bilong

yumi," Gavana i tok.

"Plen bilong kamapim Ela nambis i stap 6-pela yia i go.

"Sapos mipela i laik mekim siti i kamap nupela olsem ol narapela kantri, mipela i mas long mekim ol dispela kain fesiliti.

"Ol narapela eria olsem Unagi Oval na Jack Pidik Pak i stap, tasol mipela i save yusim long ol narapela bung na spot. Tasol, Ela nambis em i wol klas hap bilong ol famili i ken go raun long ol wiken," Parkop i tok.

Intras Supa Kap- 2017

Intras Supa Kap lata

Posisen	Tim	MP	W	D	L	TP	PTS
1.	PNG Hunters	14	11	0	3	358:224	24
2.	Sunshine Coast Falcons	15	11	1	3	423:241	23
3.	Redcliffe	14	10	0	4	333:201	22
4.	Souths Logan	14	9	0	5	351:285	20
5.	Eastst Tigers	14	8	1	5	325:290	19
6.	Townsville	15	8	2	5	379:319	18
7.	Ipswich	14	7	0	7	324:339	16
8.	Wynnum Manly	14	6	0	8	258:241	14
9.	Mackay	14	5	1	8	289:362	13
10.	Norths Devils	15	6	0	9	360:369	12
11.	Central Capras	14	4	1	9	282:383	11
12.	Northern Pride	14	4	0	10	224:317	10
13.	Burleigh	14	4	0	10	206:318	10
14.	Tweed Heads	15	4	0	11	225:448	8

Dro bilong raun namba 16

Det	Hom	Awe	Pilai Graun	Taim	Hashtag
Sarere 24th	Northern Pride	PNG Hunters	Barlow Park	5.30pm	#PRIDEvPNG
Sarere 24th	CQ Capras	Eastst Tigers	Browne Park	6.00pm	#CQCvTIGES
Sarere 24th	Wynnum anly Seagulls	Sunshine Coast Falcons	BMD Kougari Oval	6.00pm	#WYNvSCF
Sande 25th	Souths Logan Magpies	Redcliffe Dolphins	Davies Park	2.00pm	#SLMvPHINS
Sande 25th	Tweed Heads Seagulls	Townsville Blackhawks	Piggabeen Complex	2.00pm	#THSVTSVB
Sande 25th	Burleigh Bears	Ipswich Jets	Pizzey Park	2.00pm	#BEARSvJETS
Sande 25th	Norths Devils	Mackay Cutters	Bishop Park	3.00pm	#DEVILSvMC

Risal bilong raun namba 15

Det	Hom	Awe	Pilai Graun	Taim	Hashtag
Sarere 17th	Townsville Blackhawks 36 (win)	Sunshine Coast Falcons 14 (lus)	Jack Manski Oval	4.00pm	#TSVBvSCF
Sande 18th	Wynnum Manly Seagulls 16 (win)	Norths Devils 6 (lus)	BMD Kougari Oval	3.00pm	#WYNvDEVILS
Sande 18th	PNG Hunters 10 (lus)	Tweed Heads Seagulls 14 (win)	National Football Stadium	3.00pm	#PNGvTHS

Lerkin i stap long gutpela fom

OSENIA Sempionsip bai kamap klostu nau na, Ephriam Lerkin, husat i gat 19 krismas i stap long gutpela fom long resis long etletiks.

Lerkin wantaim narapela 4-pela etlit i bin resis long Thailand Open Sempionsip na Lerkin i bin opim kempen bilong em wantaim stail kala long las wik Mande.

Lerkin i winim mak insait long 48.35 seken long 400 mita resis. Bihain long wanpela aua, em i bin winim semi fainal resis bilong em insait long 48.52 seken.

Long de namba tu, em i soim top level kala bilong em long 400 mita hadel fainal long winim resis insait long 51.56 seken bihain long em i winim semi fainal wan-

taim 53 seken.

"Em i bin winim fainal bihain long tupela aua na 30 minit bilong semi fainal em i bikpela samting tru," Presiden bilong Etletik PNG, Tony Green, i tok.

"Mipela i no bin ting olsem Ephraim bai winim mak insait long dispela kain taim long 400 mita hadel resis tasol em i kamap wantaim

dispela risal na nau em i stap long bikpela fom.

"Dispela kala i kamap bihain long em i bin trening strong long NSI long Goroka, Isten Hailans long dispela yia."

Green i tok tenkyu long sponsa bilong em, Simberit Gol Main na tim sponsa, PNG Olimpik Komiti, long mekim dispel i isi.

Hunters i redi

SP PNG HUNTERS i redi long pilai egensim ol Northern Pride long Sarere na i lukluk long mekim gut long gem bilong ol bihain long ol i no pilai gut long gem i kamap long wik i go.

Marum i tok olsem ol i lus long ol Tweed Head Seagulls na em i wanpela nogut kala ol i soim. Dispela i kirapim tingting bilong ol long pilai gut egensim ol Pride.

"Dispela em i wanpela nogut gem we tim i stap long long top ples long lata. Mi ting olsem mipela i strongim banis bilong mipela, tasol mipela i nid long stat pilai gut," Marum i tok.

"Mipela i trening strong long mekim gut long dispela."

Em i tok moa olsem tim i stap long top ples long lata na ol i thing long daunim ol lasples Tweed Head Seagull, tasol ol i no daunim ol.

"Olgeta pilaia i ting olsem ol bai ran strong long pilai graun na win. Ol i lukim Seagulls olsem wanpela liklik tim, tasol ol i skulim gut mipela gut tru.

"Em i gutpela long mipela bai bungim ol Seagull gen long raun namba 25 na em i taim bilong mipela long bekim win bilong ol," Marum i tok.

Vais kepten bilong ol Hunters, Wellington Albert, bai no inap pilai bikos lo bilong QRL i rausim em bihain long em i mekim wanpela strongpela takel long las wik Sarere.

Marum i makim Muka Peter Kulu long kisim ples bilong em.

Ase Boas bai kisim ples bilong Wartovo Puara na Puara bai kisim huka ples bilong em.

Rhadley Brawa i kisim ples bilong David Loko bihain

long em i stap wantaim ol Enga Mioks.

Loko bai no inap pilai bikos em i sik na Enock Maki bai no inap pilai tu bikos em i kisim bagarap long join bilong em.

Faiv-eit bilong Kroton Hela Wigmen, William Mone, i joinim ol Hunetrs na i stap long bens wantaim Brandy Peter.

Ol bai go long Cairns long Fraide.

Ol 20 man skwat em:

Stargroth AMEAN, Bland ABAVU, Israel ELIAB, Adex WERA, Paul WAWA, Ase BOAS - kepten, Watson BOAS, Muka Peter KULU, Wartovo PUARA, Esau SIUNE, Nixon PUT, Rhadley BRAWA, Stanton ALBERT

Sailas GAHUNA, Willie MINOGA, Lawrence Tu'u, Brandy PETER, Karo KAUNA Jr, William MONE, Butler MORRIS



Dior Lowry (Het Kosa)
Grup 1 (Hadel, Tro)

Debono Paraka	
Jaqueline Travertz	
Sharon Toako	
Raylyne Kanam	4x400m
Ephraim Lerkin	4x400m
Mowen Boino	
Adrine Monagi	

Phillip Newton (Tim Menesa)
Grup 2 (Ol Jam resis)

Rellie Kaputin	
Roland Hure	4x100m (Anda 20)
Robson Yinambe	
Peniel Richard	

Wilson Malana (Kosa)
Grup 2 (Distens)

Poro Gahekave	
Simbai Kaspar	
Abel Siune	
Kaminie Matlaun	4x400m
Esther Simon	
Tuna Tine	
Martin Orovo	
George Yamak	

Allan Akia (Kosa)
Grup 2 (Sprin & Rilei resis)

Nelson Stone	4x100m
Theo Piniau	4x400m
Nazmie-Lee	4x100m
Emmanuel Wanga	4x400m
Damien Kotu	
David Guka	
Wesley Logorava	4x100m
Charles Livuan	4x100m
Toea Wisil	
Letisha Pukaikia	4x100m anda 20
Lawrence Lamond	4x100m anda 20
Nancy Malamut	4x100m anda 20
Lyenne Nilmo	4x100m anda 20
Leeroy Kamau	4x100m anda 20
Leonie Beu	4x100m anda 20
Shirley Vunatup	4x400m

Tim PNG i redi long Osenia Sempionsip

ETLETIK PNG i makim fainai skwat bilong tim PNG wantaim 36 etlit husat bai resis long Osenia Sempionsip long Suva, Fiji long wik i kam.

Tim i kamap wantaim 24 man na 12-pela meri etlit em i wanpela strongpela tim husat bai resis long olgeta grup bilong etletik olsem hadel, long distens, ol jam na tro long open divisen na wantaim sprin na midol distens skwat.

Long open etlit tim i lukim 4-pela junia gel na 5-pela junia boi.

Ol etlit i save stap long USA em Rellie Kaputin, Adrine Monagi, Poro Gahekave, Peniel Richard, Wesley Logorava, Robson Yinambe, Sharon Toako na Shirley Vunatup olgeta bai kam long Sempionsip na joinim ol etlit i save stap long Gold Coast olsem Toea

Wisil, Theo Piniau na Nazmie Lee Marai husat ol i stap long gutpela fom tu.

Toea Wisil i stap long Townsville long las wiken we em i winim mak insait long 11.36 seken long 100 mita resis.

Marai i setim rekot bilong em yet long 100 mita resis insait long 10.69 seken na Piniau i setim rekot bilong sisen wantaim 48.20 seken long 400 mita resis.

Ephraim Lerkin na Emmanuel Wanga i winim mak insait long 48 seken na Kaminie Matlaun i mekim gut long 4*400 mita resis bilong ol man.

Bipo rana i save makim USA, Jeremy Dodson, i resis long go long Samoa i statim resis bilong em long 100 mita na 200 mita resis wantaim Gol Medal wina bilong Pasifik Gems, Banuve Tabacacor, i lusim etletik na

joinim ragbi yunion.

Tasol, ol PNG etlit olsem Marai na Piniau bai givim strongpela salens. Wesley Logorava na Nelson Stone i redi long salensim ol narapela boi Fiji.

Debono Paraka bai resis long hama tro hammer throw.

Letisha Pukaikia na Lawrence Lamond anda 18 sprin. Nancy Malamut, Leonie Beu na Lyenne Nilmo bai resis long anda 20 divisen bilong ol meri.

Ol tim opisal em; Nola Peni (Menesres), Dior Lowry i het kosa bilong hadel na tro, Allan Akia i kosa bilong sprin na rilei, Wilson Malana i kosa bilong midol na LD na Phillip Newton em i kosa bilong ol jam resis.

Bikpela grup bilong tim bai go long Sande, Jun 25, na liklik grup bai go pas long Fraide, Jun 23.



Ephraim Lerkin long lep han i winim mak insait long traime resis bilong em na Kaminie Matlaun i mekim gut long 4*400 mita resis bilong ol man.

BFPNG i kamap Twlait Basketbal salens

BASKETBAL Federesen bilong Papua Niugini (BFPNG) i kamapim Twlait Basketbal resis we i klostu long 2000 manmeri i resis wantaim long ol 6-pela Fraide nait sesen.

Long ol wan wan grup, ol yangpela lain namel long faiv (5) i go inap long 15 krismas i gat sans long pilai ful kot gem we pilai i kamap namel long 5-pela pilai long wan wan tim long 5.00 kilok apinun i go inap long 7.00 kilok apinun.

Ol pilaia i gat 16 krismas na i go antap em ol i bin stap pilai long 7.00 kilok nait i go inap long 9.00 kilok nait.

"Dispela program i bungim bikpela namba bilong ol manmeri na pikinini," CEO bilong BFPNG, Joel Khalu, i tok.

Mioks, Tumbe, Gurias na Tigers i win

Philemon Tame i raitim

RAUN namba seven (7) bilong Digicel Kap resis i lukim ol Enga Mioks, Waghi Tumbe Rabaul Gurias na Lae Snax Tigers i win.

Ol Mioks i daunim ol Hela Wigmen, 24-4, long Pot Mosbi, Tumbe i daunim ol Port Moresby Viper, 34-3, long long Minj, Gurias i daunim Mendi Muruks, 16-4, long Kokopo na ol Lae Tigers i daunim ol Goroka Lahanis, 20-18, long Goroka.

PMBL i kam klostu long pinis bilong raun

PNG BASKETBAL Lig resis bilong ol man (PMBL) i go klostu long pinis bilong raun namba wan bilong 2017 sisen.

Moni Plus Tamaras i daunim ol Wests Jokers, 91-63,

na ol KSS Southern Flames i daunim ol Superior Coffee Saints, 83-67.

Las gem namel long ol G3 Chariots na @K Tigers i no bin kamap na tim Emperador i stap sambai.

Komisina bilong PMBL resis, Erick Elai, i tok olsem i gat wanpela wik i stap yet long pinisim olgeta gem bilong raun namba wan bilong resis.

"Ol bai mekim disisen bi-

hain, bilong gem bai kamap long dispela wik o nogat bikos poling bilong nesanel ileksen bai stat long dispela wiken," Elai i tok.

Hunters i stap long top ples yet



Ol pilaia bilong Hunters i bung long takelim pilaia bilong ol Tweed Head Seagulls long resis i kamap long las wik Sarere we ol Seagulls i daunim ol Hunters, 14-10, long Nesenel Futbol Stediam. Poto: Nicky Bernard.

Philemon Tame i raitim

SP HUNTERS i lus long raun namba 15, 14-10, egensim ol Tweed Head Seagulls, tasol ol i stap namba wan ples yet long lata.

Ol Seagulls i stap las ples long lata long resis i kamap long las wik Sarere long Nesenel Futbol Stediam, asples bilong ol Hunters na daunim tim i stap long top ples.

"sapos mipela i lukautim

gut futbol resis bilong mipela em mipela i ken pilai gut na win," Kosa bilong ol Hunters, Michael Marum i tok.

"Mipela i stap pas yet long lata bikos ol Townsville Blackhawks i daunim ol Sunshine Coast Falcons. Dispela em i gutpela stori long mipela."

Kosa bilong ol Tweed Head, Aaron Zimmerle, i tok olsem ol i daunim ol Hunters em olsem ol i kalapim

bikpela maunten.

Zimmerle i tok, ol Hunters i winim planti bilong ol resis i kamap pinis long dispela sisen na ol i gat bikpela sans long winim Intras Supa Kap salens.

Ol top sikis (6) tim em; SP Hunters i stap namba wan wantaim 24 poin, Sunshine Coast Falcons i stap namba tu wantaim 23 poin, Redcliffe Dolphins i stap namba tri wantaim 22 poin, Souths

Logan Magpies i stap namba foa wantaim 20 poin, Easts Tigers i stap namba faiv (5) wantaim 19 poin na Townsville Blackhawks i stap namba sikis (6) wantaim 18 poin.

Raun namba 16 i lukim ol Hunters bai pilai egensim ol Northern Pride long Sarere long Barlow Pak long Australia.

Gem bai stat long 5.35 apinun.



BAI YU GO WE: Pilaia bilong FC Yamaros i banisim pilai meka bilong Huawei PS Ruts long kisim bal long Nesanel Soka Lig pilai bilong ol long Pot Mosbi. PS i daunim Yamaros 2-0.



Andrew Lepani bilong Genesis i holim bal long lek bilong em taim tupela pilai bilong Maclarens i traिम long rausim long em long Prima Man pilai bilong ol long PMSA resis. Genesis i win 2-0.



Oi yangpela meri i go askim PMSA Dairekta Robert Sabari long dro bilong ol long Mande pilai long taim bilong pablik holide.



Winga bilong Hela Wigmen i traिम long abrusim tupela pilaia bilong Pot Mosbi Vipers long Digicel Kap resis long Pot Mosbi. Vipers i lus long Wigmen na dispela i mekim namba 5 lus bilong Viper.



Holim Mi: Willie Minoga bilong SP PNG Hunters i brukim banis bilong Tweed Heads Seagulls long pilai bilong ol long Sarere. Hunters i lusim dispela pilai 14-10.




Straika bilong PS Ruts i rausim bal long han bilong gol kipa bilong Yamaros long pilai bilong ol long Sarere NSL pilai bilong ol.



Straika bilong Guria i redi long kik bal go long gol mak bilong ol PS Rutz taim pilaia bilong PS Rutz i lukuk long em long Pot Mosbi Soka resis. Guria i guriaim Rutz 4-0.



Senta bilong Vipers i flai long putim trai bilong ol taim ol bung wantaim Hela Wigmen. Wigmen i win.
Ol Poto Nicky Bernard



WHITE TUNA FLAKES
DIANA White



PROUDLY PNG MADE
Manufactured by:
RD Tuna Canners Ltd.

WHITE TUNA
insait
K 2.20



Tasty and Flavourful White Tuna for Everyone!

Maroons winim Blus 18 – 16

NAMBA tu Stet ov Orijin pilai i lukim Maroons winim Blus 18 – 16 long ANZ Stadium long Sidni, Australia long aste nait.

Dispela i mekim ol komenteta bilong pilai i tok Stet ov Orijin pilai is tap laip yet.

Dispela long wanem namba wan pilai em ol Blus i winim 28 – 4 long Suncorp Stadium long Brisben long tripela wik i go pinis.

Ol komenteta husat i save long rekot olsem ol pilai graun bilong Sidni i matmat bilong ol Maroons na olsem ol i ting i pinis bilong Stet ov Orijin bikos Blus bai win yet. Tasol abrus na ol Maroons i win na dispela i mekim ol sapota na komenta i amamas olsem Orijin pilai siris is tap laip yet.

Long namba wan Stet ov Orijin Maroons hap bek Jonathan Thurston i no bin pilai tasol long dispela namba tu pilai em i pilai na helpim ol long win.

Namba tri pilai bai kamap gen long Suncorp Stadium,

Brisben long 5 Julai long lukim husat bai winim 2017 Stet ov Orijin siris.

Maroons winga Dane Gagai i putim tupela trai long helpim Maroons long win tu.

Long pilai yet namba wan trai i kamap taim winga Valentine Holmes i kisim bal long senta Darius Boyd long skoa long lephan kona bilong Blu long 9 minit na pulim blut bilong ol ol blu skoa. Hap bek Jonathan Thurston i kikim tupela poin long bringim skoa i go pas wantaim 6-0.

Tasol foapela minit bihain Jarrod Haynes i ran strong pusim ol pilaia bilong putim trai bilong blu. Referi Gerard Sutton i no westim taim na givim trai we James Maloney i kikim tupela poin long apim skoa i level 6-6.

Bihain long dispela long 20 minit i lukim Brett Morris i kisim bal long James Maloney long skoa gen bilong ol Blus na givim foapela poin moa. Tu poin kik i abrus na Blu i go pas yet wantaim 10-

Stet ov Orijin pilai stap laip yet



Dane Gagai bilong Maroons i skorim las trai long lukim Maroons i winim Blus 18 – 16 long holim spirit bilong Orijin pilai i stap laip yet. Foto: AAP

6. Tupela minit bihain gen hap bek Mitchell Pearce i kisim bal long fulbek James Tedesco long givim narapela foapela poin long ol Blu. Maloney i kikim tu poin we i bringim skoa bilong ol i go antap long 16 – 6. Skoa i stap olsem yet

taim tupela i go kisim hap taim malolo. Long hap taim Maroon kos Kevin Walters i tok i gat ol asua long holim pas gut bal we ol i mas wok strong long em long lukim pilai i kamap gut. Long 53 minit dispela i lukim

planti mis takol bilong ol Blus we i mekim winga Dane Gagai i putim trai bilong ol Maroons. Thurston i kikim tupela poin long bringim skoa bilong ol Maroon 12 – 16. Long 76 minit Maroons winga Gagai i kisim bal long

kepten Cameron Smith long putim namba tu trai bilong em. Thurston i kikim tupela poin long lukim ol i go pas long winim gem Maroons 18 – 16. Hap bek Thurston i amamas long pilai na tok ol i stap bilong sapotim ol yet.

Strongpela Marasin Bilong Kus Gutpela Prais!

Good Products, Better Prices, ikam long

 **Johnstons Pharmacies Ltd**

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg

